

光緒江西通志

江西通志卷一百四十三

列傳十 臨江府

漢

孔恂字巨卿新淦人爲州別駕車制舊有屏星如刺史車式刺史行部發傳晏移怒欲撤別駕屏星恂曰使君傳自晚發欲撤屏星毀國舊制別駕可去屏星不可撤卽投傳去刺史追謝乃止

林志

晉

留京臨江郡人孝行推於鄉里時江水暴漲居民皆漂溺京負其母號泣忽有大龜至其前舉家七口俱上龜背行十許里及於高岸遂失龜

豫章書引九江記謝志舊案晉時未有臨江

郡留京事林志不載

楊羨新淦人爲湘州刺史引桂陽羅含爲主簿含傲然不顧羨招致不已辭不獲而就焉及羨去職含送之到

新淦 晉書羅含傳

唐 南唐圻

魯季文清江人貞元閒廬父母墓江水遠不可汲忽一虎於廬側跑地得泉人以爲孝感名其坊曰虎泉今爲孝感坊云 林志

楊彥伯字鼎臣新淦人大順閒擢童子科昭宗親試之彥伯應對詳雅上曰劉晏之徒也以詩賜之後爲安福令州以異狀聞賜緋魚厯官門下侍郎 林志

袁鳴臨江人以事親居喪著旌表門閭賜粟帛州縣存

問復賦稅 新唐書孝友傳 謹案江西之臨江軍置自宋初前此未聞也 晉有臨江縣屬益州巴郡

唐有臨江郡屬嶺南道冀州孝友傳總敘臨江袁鳴列
建昌熊士瞻贛縣謝俊之開當為江西人縣志謂史家
從後追書近之晉之留京或臨江縣
人也九江記亡於北未不可攷矣

鄧佑弟佶新淦人佑擢南唐童子科佶登三禮科鄉人
易其鄉曰揚名里曰雙秀

林志

宋

曾文照新淦人七歲應南唐童子科擢第三李氏歸宋
為亳州永城令上疏論邑利害免挽船夫力歲以萬計

遷蒙城蝗不入境終大理司直

白志

謝志舊案曾文照林志重見吉安人物

作文昭白志刪彼存此列入南唐今改入宋照與昭未詳孰是

孫冕新淦人雍熙進士天禧末守蘇州王欽若出鎮餘
杭素與冕友檣舟吳門佯醉謂冕曰兄淹遲日久當別
置委曲冕正色拒之欽若愧謝後謝郡歸九華山召竟

不起林志

曾乾度字順承文照子淳化進士兩任推官三典州縣

未艾乞祠起知筠州竟謝事歸林志謝志舊案舊志有王欽若何正臣傳欽

若歷相兩朝無可紀之蹟正臣因蔡確薦為御史領陷蘇軾俱有玷人物今削

蕭律字調元新喻人景德二年賜明法及第為廣州司

法民有犯劍論及流死者百餘人律以狀聞罪止於杖

守汀州以屬邑上杭多嵐瘴奏遷縣治於平曠之地仕

者免客死徙潤州以江道紆回風濤為患開直道通舟

歲省淘河工五萬璽書褒諭累官金部員外郎林志

蕭諤新喻人以詩易二經教授鄉里訓四子博學有名

皆登第林志

丁雋字德偉新喻人通春秋時號丁三傳事親至孝篤

宗族五世聚居踰二百口均愛如一大中祥符間旌其

門

林志

宋玘字子美新淦人鄉貢至京夜夢一僧語曰公才高
當擢第惜壽不永若速還可延翌日卽南歸不復進取
人推爲鄉先生三孔皆出其門

林志

蕭賀字慶之諤長子咸平進士屢官御史負直聲臺有
樗木或曰樗凡材宜易柏賀曰道有不直官惟其人作
宥樗賦終職方員外

人物志

劉立之字斯立式子大中祥符進士爲連江尉累官湖
北路轉運使坐事免起漣水軍會西南蠻獠叛諸路請
益兵上問立之因備言可蓄不可捕狀卒如其議尋遷
益州路轉運使子敞敞爲時名臣

林志
謹案傳志言立之式子而無式傳

式字叔度南唐進士入宋仕終刑部郎中有子五長立
本官下蔡令次立言歷九官皆稱治次郎立之又次立德官至光祿卿次立禮五世孫誠之性之自有傳

蕭貫字貫之諤仲子與弟賁同登大中祥符第仁宗初

官大常丞出知洪饒二州時有撫州參軍孫齊者出其

妻杜氏娶周氏入蜀復納倡陳氏并挈周所生子之官

未幾周亦至齊怒手刃其子周訴州及轉運皆不受理

或告之曰訴洪州蕭使君白矣周乃馳告撫非貫所部

特檄治之雖更赦猶論齊編管遷兵部員外郎召試知

制誥卒有文集二十卷

林志

楊申字宣卿新喻人天聖進士乙科上饒丞入為太常

少卿遷光祿卿正色立朝與王安石論新法不合出知

濟州多善政監司皆新進申以舊人崎嶇不樂仕遂乞

歸呂大防表所居爲耆德坊

林志

陸起新淦人慶厯進士爲英州眞陽令有巫以銀瓮貯二蛇自嶺北至眞陽誘民迎且祠焉觀者填路起聞驟至蛇所亟令出瓮斬之捕巫劾其姦遠近稱爲神明仕

至員外郎

人物志

劉敞字遵父臨江人舉進士甲科通判蔡州召試還直集賢院判尙書考功仁宗賜夏竦諡曰文正敞言竦之行邪而諡之以正不應法疏三上仁宗爲更竦諡同修起居注尋遷右正言知制誥奉使契丹素知山川道里遼人歎其博物使還求知揚州徙鄆州糾察在京刑獄嘉祐四年貽享羣臣上尊號敞言非古仁宗然之請外知永興軍召還翰林治平中判太常丞改集賢院學士

判西京留司御史臺卒年五十倣爲人明白俊偉博學
自信自六經諸子百氏下至傳記小說無所不通爲文
敏贍在西掖時一日追封皇子公主九人倣將下直爲
之立馬卻坐一揮九制文詞典雅各得其體在長安得
先秦古器數十愛其款識文字奇古因以考知三代制
度與先儒所說不同者所著春秋傳權衡說例意林總
四十卷文集六十卷弟子記五卷七經小傳五卷東都事略
白志舊案歐陽公所撰墓志以倣爲吉州臨江人宋
史以爲袁州臨江人考臨江軍建於宋淳化三年領清
江新喻新淦三縣寰宇記所未及載此時新喻尚隸袁
州新淦尚隸吉州其後乃分二州之地置臨江軍故袁
吉得並稱
臨江也

劉攽字貢父與兄倣同學遂偕中進士調江陰簿爲國
子監直講趙槩薦攽可備文館召試優等熙甯初知太

常禮院神宗手詔推求太祖諸孫屬行尊者爲王以奉
太祖後攷曰禮諸侯不得祖天子太祖傳天下於太宗
繼體之君皆太祖子孫不當別爲太祖置後臣以謂太
祖子惟德昭德芳二人宜從其後世世勿降爵宗廟祭
祀使之在位則陛下褒揚藝祖休顯著明矣考試開封
府進士程文有用小畜字者王介謂犯神宗嫌名攷曰
此六畜之畜亦嫌名也因紛爭御史劾之遂出通判泰
州代還爲集賢校理判登聞鼓院三司戶部判官知曹
州曹素多盜朝廷立重法而盜不息攷曰民不畏死奈
何以死懼之至則尙寬平務在不撓視官屬如子姓歲
中盜賊衰息召爲開封府判官元豐初出爲京東轉運
使罷知兗州徙亳州元祐初召爲祕書少監以疾求補

外召拜中書舍人卒年六十七所著文集暨五代春秋
內傳國語經史新議東漢刊誤詩話錄芍藥譜漢官儀

凡百卷

東都事略

蕭映字仲景新喻人天聖進士筮仕吉水威惠並行邑
大治每歲輸詣郡皆泝流而上映請築倉近郭以便輸
將後知道州終屯田郎中

林志

蕭固字幹臣新喻人天聖進士授太常博士通判虔州
諸邑剽劫固授成算不踰月誅縛殆盡璽書獎諭改知
桂州兼廣西轉運使時儂智高侵邕州廷議皆欲進討
固知智高凶狡預陳羈縻之策於樞府不果用後智高
果叛人服其識交州貢麒麟固力諫卻之累官集賢殿

修撰

人物志

歐陽賓字國華新喻人五經出身宜黃尉時盜夜殺人舟中無所掠而去賓疑之呼死者妻詰之色動乃姦夫也捕實於法再遷虔州左司理多所平反四遷爲比部員外郎通判饒州

林志

孔延之字長源新淦人孔子四十六世孫慶厯進士九遷至司封郎中平生與周敦頤友善在廣西寬恤民力舊賦糴於民歲至六百萬石程督與租稅等延之計歲糴二十萬而足欽廉雷三州蠻戶爲富人所役延之奪使自爲業者六百家皆著定令改荆湖北路提點刑獄罷鼎州六寨戍兵千餘人諸子並以文章顯世號臨江三孔

人物志

胡向清江人皇祐進士自袁州司理厯審刑院詳議權

大理卿決獄仁恕所至無冤嘗倅越州奏課爲天下第

一

人物志

陳公炎字易卿新淦人皇祐初擢第知醴陵縣時朝廷變鹽法吏緣爲奸上疏蠲除之八遷至諫議大夫七十

致仕

人物志

傅燮字志康清江人嘉祐進士熙甯中由幕府累遷少府少監專劇郡所至有聲尤博學藏書萬卷皆手自校

勘年八十好學不衰

林志

蕭注字巖夫新喻人由進士攝番禺令儂智高圍廣州注突圍出募壯士得二千人連舶乘風縱火焚賊舟破之智高走大理禽其母與二弟募敢死士入大理智高已死函首歸獻擢禮賓副使廣南駐舶都監知邕州尋

貶鎮南節度副使會有訟注功者起右監門將軍邠州

都監熙甯初交人挫於占城眾不滿萬時謂可取以注

知桂州將圖招徠之策會遣沈起代之罷歸卒於道林

孔文仲字經父臨江軍新淦人也少刻苦問學號博洽

舉進士又舉賢良方正召試對策極論新法之害不爲

王安石所喜黜不用哲宗卽位爲校書郎遷禮部員外

郎有建議皇族惟楊王荆王得稱皇叔餘疏屬當各係

其祖若唐人稱諸王孫之比文仲曰上新卽位宜廣敦

睦之義不當疏閒骨肉議遂寢擢起居舍人拜左諫議

大夫論青苗免役之法爲首困天下論保甲保馬茶鹽

之法爲遺摺留蠶遷中書舍人卒年五十文仲學識高

遠天資狷介寡言笑少所合有文集五十卷

東都事略

謹案

澄縣志注文仲新淦人宋史列傳新喻人金幼孜文靖集文仲祖孔績新淦人文仲之後孔源新淦人

謝舉廉字民師新喻人少與弟世充從父懋叔岐同學

元豐八年叔姪兄弟連第時號四謝以擬三孔舉廉宰

南康有善政尤工於詩所著有藍溪集

林志謹案新淦縣志注舉廉

新淦人府志通志作新喻考劉弇序載謝世充言曰占數臨江之新淦於茲爲十世則四謝實新淦產也

蕭從字從義新喻人元豐進士分宜令遷宗學博士權

御史臺主簿蔡京欲處以六察使排異己者從謝不能

乞郡除河南少尹擢陝西運判卒

林志

李諮字仲詢臨江軍新喻人幼時父出其母日夕泣涕

求母還至絕葷茹鄉里稱孝舉進士累擢知制誥權三

司使建言天下賦入有常而用度日滋願一切裁抑之

又以商人入粟邊郡算茶與犀象爲虛實三估坐耗官

帑請以實錢參紐由是怨謗滋起出知洪州徙永興軍
累官知樞密院時權茶法寢壞復用諮法而官無濫費
諮性明達周知世務在樞府號爲稱職卒贈右僕射諡

憲成

東都
事略

李巖臨江人元祐二年知東莞縣以能名邑東瀕江田
每罹夏潦之害巖於西湖福隆右貝司馬頭巾山牛渡
海諸處築長隄捍之民獲其利明年復築鹹潮隄十有
二延袤一萬六千八十丈田二萬餘頃至今賴之

廣東
通志

劉奉世字仲馮敞子元祐初擢起居郎詔冊乾順爲夏
國主以奉世使西夏遷天章閣待制樞密都承旨除吏
部侍郎權戶部尙書以樞密直學士僉書樞密院事罷
爲端明殿學士知成德軍坐元祐籍責光祿少卿再貶

隰州團練副使郴州安置後移居道州徙光州復端明
殿學士知定州又知鄭州以言者落職提舉崇福宮以
舊職致仕

東都事略

孔武仲字常父文仲弟舉進士爲禮部第一元祐初爲
祕書省正字遷著作郎論科舉之弊詆三經新義請復
詩賦取士遷國子司業侍講邇英數月拜中書舍人直
學士院時議祠北郊久不決武仲請用純陰之月親祠
如神州地祇遷禮部侍郎出知洪州移宣州坐元祐黨
奪職居池州卒所著詩書論語說金華

舊志

講義內外

制雜文共百餘卷

東都事略

孔平仲字毅父文仲弟舉進士元祐中入館選卽出爲
京西路提點刑獄坐黨籍謫知韶州又責惠州別駕英

州安置徙單州團練副使饒州居住徽宗卽位召還爲
戶部員外郎遷金部郎中出使陝西帥鄜延環慶奉祠
而卒平仲有史學著續世說行於世

東都事略

胡靜字應侯向之子磊落有大志讀兵書應武舉試祕
閣爲第一從西師入夏界修羅九城破賊於賞逋嶺勇
冠三軍以功加閣門祇候累遷秦州東路蕃漢巡檢

林志

陳竑字君度新淦人元祐進士鎮安軍節度使推官郡
頻年患水因條陳全城隄決溝澮等事會詔釐正祀典
竑悉毀淫祠又常率同僚瘞枯骨之無歸以籍沒產給
寓喪於佛祠者兄弟三人以父蔭敘相遜自取科第終
以直氣不撓罷

人物志

郭奉世字少馮新淦人元祐進士羅田令改知永新有

異政泰和民素苦令詣漕司乞更奉世永新之民遮留不可乃寓兩界兼理之山東盜起擢知密州破巨盜張海等數萬五遷至徽猷閣待制移守襲慶金兵再至有旨以徐兗兵赴闕和議成退保宿毫移軍於濟謝事歸

里

林志

張仲友世家新淦元祐末父早喪事母至孝人呼爲張孝子鄉先生宋玘爲作傳劉次莊書於戲魚堂

林志

李大有字仲謙新喻人紹聖進士累擢中書門下省檢校公事權給事中守虔州宣和末金人犯京詔諸道勤王大有募義勇五千人入援後守三衢有寇猖獗下車

卽平

林志

李邈字彥思臨江軍清江人以父任爲太廟齋卽用薦

擢提轄環慶路糧草通判河間府以忤蔡京童貫換右
列爲遼國賀正副使還以上書言契丹不可滅免官久
之進都大提舉京西汴河隄岸改知嚴州代還貫欲以
西師入燕邈復語貫曰方臘小醜一呼屠七州四十餘
縣竭數路之力而後能平之殆天以此警公也何可遽
移之北乎因密教貫陰佐契丹以圖金人貫不能用乃
乞致仕貫收復燕山奏邈知涿州改易州皆辭不赴歎
曰禍自茲始矣金人犯京師詔趣入見旣至上言种師
道宿將有重名二敵所畏朝廷自主和議而盡以諸道
兵畀師道視敵爲進退將在軍中君命有所不受使見
可擊而進勝固社稷之福不勝亦足使敵知吾將帥有
以國爲任者上稱善而耿南仲方主和議不合乃以邈

爲京城西壁守禦使邈言姚平仲敗績而敵猶不敢留
是畏我也不以种師道再戰已失機會尙可尾其行及
河半渡擊之猶足爲後戒議復格三上章致仕不允權
樞密副都承旨出爲河北西路制置使守眞定拜青州
觀察使仍知府事金人至邈乞師於宣撫副使劉韜且
聞道走蠟書上聞皆不報城被圍且戰且守相持四旬
城破邈巷戰不克將赴井左右持之不得入幹離不火
燎其鬚眉及兩髀亦不顧乃拘於燕山府金人命邈被
髮左衽邈憤詆毀甚力金人搥其口猶吮血嘆之翼日
自去髮爲浮屠遂遇害將死顏色不變南向再拜端坐
就戮贈招化軍節度使諡忠壯

宋史

胡聖隆字藏之於書無不讀恥爲王氏學不事舉業自

號瀟灘居士賢士大夫樂與游政和初以白衣上封事

召未及對而卒

林志

胡洵直字次魚新喻人宣和間以貢入京著中興策二十五篇後舉進士累官湖南提刑司幹官深於詩凡子

史靡不涉獵有蘭谷集十卷

林志

蕭建功字懋德新淦人嘗從陳了翁瓘遊瓘器重之時

李樸謫歸貧不能自給建功爲築室居之樸死以女妻

其子義聲日著李綱薦其操行累官知衡州刻思賢堂

法帖三十卷

人物志

謝志舊案宋時未有

峽江縣人訛白志據林志改正

正

向子諲字伯恭臨江人欽聖皇后從姪也補承奉郎宣和初除江淮發運主管文字有欲溶河與江淮平者子

諶言河高江淮數丈而欲濬之使平決不可曩有司三日一啟閘復作堰儲水故水不乏比年行直達之法啟閉無節堰閘率不存今復故制嚴禁約則無患使者用其言漕復通進秩一等爲京畿轉運副使尋兼發運副使金人犯亳州子諶以書遺金人言兵勢逆順令退保河外金人遽以亳宋等州守禦所牒報之約日索戰諸道兵畏縮不進時康王次濟州子諶遣進士李植獻金帛及本司錢穀之在濟州者以助軍費張邦昌僭位使其甥劉達齎手書來子諶不啟封焚之械繫達於獄遷直龍圖閣江淮發運副使以素爲李綱所善故黃潛善斥之起復知潭州金人破江西移兵湖南子諶聞警報率軍民死守金人圍八日登城縱火子諶率官吏奪南

楚門遁坐敵至失守落職賈收言子諲督兵巷戰又收
潰卒復入治事帝亦以子諲與他守臣望風遁者殊科
詔復職移鄂州主管荆湖東路安撫司劇盜曹成據攸
縣子諲軍於安仁單騎入賊中諭以國家威靈成不服
執子諲歸會馬廣遣人持吳敏檄諭成成許受招始釋
子諲詔提舉江州太平觀起知廣州尋移江州改江東
轉運使徙兩浙路都轉運使除戶部侍郎以徽猷閣直
學士知平江府金使議和將入境子諲不肯拜金詔上
章言自古人主屈己和戎未聞甚於此時宜卻勿受忤
秦檜意乃致仕退閒十五年號所居曰薌林卒年六十

八

宋史

歐陽元量字宏中新喻人少有遠志與弟邦昌入青原

山著決勝兵要經進於上時傅雱通信兩宮奏元量與俱假從事郎以行使還自甯鄉令轉陽山有盜結獠獠為暴元量率三鄉民兵屯富連巖佛寺盜夜劫寺與戰不利被殺

人物志

歐陽邦昌一作昌字德升靖康間在太學張邦昌僭號或勸避諱答曰吾知有國諱耳遂辭歸後以恩科終永淳

令人物志

謝磐字安國累舉廷對高宗作損齋磐言未能損者八有司以言訐置第二時稱八損狀元

人物志 謹案新淦縣志磐舉廉從孫

蕭燧字照鄰臨江軍人紹興進士授平江府觀察推官時秦檜當國其親黨密告燧秋試必主文漕臺燧詰其

故曰丞相有子就舉欲以屬公燧怒曰初仕敢欺心邪
檜懷之調靜江府察推而歸孝宗初除諸王宮教授累
遷至國子司業進起居郎先是察官闕朝論多屬燧以
未歷郡縣遂出知嚴州嚴地狹財匱始至官鋸不滿二
千燧儉以足用二年之間積至十五萬以其羨補積逋
諸色皆寬移知婺州父老遮道幾不得行婺與嚴鄰人
熟知條教不勞而治除吏部右選侍郎旋兼國子祭酒
除權刑部尙書充金使館伴十年兼權吏部尙書高宗
山陵充按行使除參知政事尋充永思陵禮儀使權知
樞密院以年及自陳除資政殿學士提舉洞霄宮卒年
七十七謚正肅子達淳熙進士唱名第四累官至太常

宋史

向潛字子源子諲仲子常從胡五峯游端重有父風倅

邵陽未幾卽挂冠歸

林志 白志舊案
向潛人物志作悟

謝諤字昌國臨江軍新喻人紹興進士調夷陵縣主簿
未上撫之樂安多盜監司檄諤攝尉條二十策大要使
其徒相糾而以信賞隨之羣盜果解散金渝盟諸軍往
來境上選行縣事有治聲改吉州錄事參軍歲大侵饑
民萬餘求廩官吏罔措諤植五色旗分部給糶頃刻而
定知袁州分宜縣縣積負於郡數十萬歲常賦外又征
縵錢二萬餘諤乃疏其弊於諸監司請免之以憂去服
闋除幹辦行在諸司糧料院尋擢監察御史奏減袁州
分宜秀州華亭月椿錢諤里居時創義役法編爲一書
至是上之詔行其法於諸路民以爲便光宗登極獻十

箴又論二節三近所當節者曰宴飲曰妄費所當近者
曰執政大臣曰舊學名儒曰經筵列職除御史中丞權
工部尙書請祠以煥章閣直學士提舉太平興國宮而
歸卒年七十四贈通議大夫諤爲文倣歐陽修曾鞏初
居縣南之竹坡名其燕坐曰艮齋人稱艮齋先生

宋史
謹

案新喻縣志諤
舉廉四世孫

羅裳新喻人母病篤裳私誓剔肝以救母刃刺入胸腹
輒摧鋒取鑪灰傅之血立止復籲天曰如母疾不愈當
易刃旣而母病少差後竟平復陳秉聞而賢之爲作里

孝傳

林志
稱孝大觀三年進士林志不載附錄於此

孔括字端中新淦人父叔三人曰源曰淑曰滋相繼登
第鄉里亦號三孔括乃淑之子嘗令瀉安廉介市號美

醞曰淳安清時以此況之名聞行在所高宗題殿柱曰
吏師孔括歲滿百姓留之上諭宰相曰可轉一官令再

任終濠州守

人物志

劉龜年字且老新喻人敎曾孫蔭從仕郎峽州司戶參
軍改錢塘簿累遷道州軍事判官守李南壽言於後守
曰判官賢不求人知恐君或失之也改宣教郎通判沅
州蠻人侵掠無甯歲龜年按法立約恩信不爽遂帖服

後乞祠階以歸

人物志

董良史字邦直新淦人紹興二年鄉薦第一判洪州時
江西運判張常先嘗憾帥臣張安道陷諸遷客冀得良
史證其事持不可移倅鄱陽秦檜當國任常先爲鷹犬
莫敢有忤其意者良史卒不阿論者偉之

人物志

鄒惇禮字和仲新淦人紹興二年中湖南北試第一授
宜春法曹開軒種竹以自娛善書得顏柳法人皆寶藏
之所著有北窗集

人物志

李維芑字仲彰清江人紹興中知新城縣以愛民爲本
民之利病纖悉洞究省徭役興學校以儒術飾吏治民
立祠祀之

明一統志

劉清之字子澄臨江人受業於兄靖之紹興進士調萬
安縣丞時江右大侵郡檄視旱徒步阡陌親與民接凡
所蠲除具得其實州議減常平米直清之曰此惠不過
三十里內耳外鄉遠民勢豈能來老幼疾患之人必有
餓死者乃請均境內之地爲八俾有粟者分賑其鄉官
爲之主規畫防閑民甚賴之詣吏部銓知宜黃縣丞相

周必大薦之召對首論民困兵驕大臣退託小臣苟媮
又言用人四事一曰辨賢否二曰正名實三曰使材能
四曰聽換授改太常寺主簿通判鄂州改衡州先是郡
飾廚傳以事常平刑獄二使者月一會集互致折餽清
之歎曰此何時也與其取諸民孰若裁諸公吾之所以
事上官者豈以酒食財貨爲勤哉至之日兵無糧官無
俸上供送使無可備已而郡計漸裕民力稍蘇嘗作諭
民書一編詞意質直簡而易從念士風未振每因月講
復具酒肴以燕諸生相與輸情論學來者日眾增築臨
蒸精舍居之作朱陵道院祠張九齡韓愈寇準周敦頤
胡安國於左祠晉死節太守劉翼宋死節內史王應之
於右部使者以清之不能媚己誣以勞民用財論罷歸

築槐陰精舍以處來學者光宗卽位起知袁州而清之疾作猶貽書執政論國事周必大來視疾謂曰子澄其澄慮清之氣息已微云無慮可澄遂卒初清之旣舉進士欲應博學宏詞科及見朱熹盡取所習焚之慨然志於義理之學所著有曾子內外雜篇訓蒙新書外書戒子通錄墨莊總錄祭儀時令書續說苑文集農書

宋史

徐夢莘字商老臨江人紹興進士爲南安軍教授改知湘陰縣會湖南帥括田號增耕稅他邑奉令惟謹夢莘獨謂邑無新田租稅無從出尋主管廣西轉運司文字時朝廷議易二廣鹽法遣廣西安撫司幹官胡

謝志誤朝廷

直與東西漕臣集議於境夢莘從行謂廣西阻山正當仍官般法則害不及民廣東諸郡並江或可容客販未

宜遽以二廣概行議與廷直不合夢莘既知賓州猶以

前議爲梗法罷去不

謝志

十三年二廣商賈毀業民苦無

鹽復從官般法矣夢莘恬於榮進每念生於靖康之亂

思究見顛末乃網羅舊聞會萃同異爲三朝北盟會編

二

謝志

百五十卷自政和七年海上之盟訖紹興三十

一年完顏亮之斃上下四十五年凡曰敕曰制誥詔國

書書疏奏議記序碑志登載靡遺帝聞而嘉之擢直祕

閣平生多所著有集補會錄讀書記志集醫錄集仙錄

皆以儒學冠之卒年八十二弟得之字思叔淳熙進士

部使者以廉吏薦以通直郎致仕安貧樂分不貪不躁

著左氏國紀史記年紀作具敝篋筆略鼓吹詞柳江志

從子天麟字仲祥開禧進士調撫州教授歷湖廣總領

所幹辦公事臨安府教授武學博士輪對言人主當持
心以敬通判惠潭二州權英德府所至有惠政著西漢
會要七十卷東漢會要四十卷漢兵本末一卷西漢地
理疏六卷山經三十卷

宋史

張紱字子儀清江人紹興進士主澧陽簿爲政廉勤綽
有時譽調衡州錄事參軍改宜春丞爲人孝友自衡扶
輿歸值秋旱舟不能前禱神江忽暴漲衡人異之子治

自有傳

林志

章穎字茂獻臨江軍人以兼經中鄉薦孝宗嗣服穎爲
萬言書附驛以聞禮部奏名第一調道州教授作周敦
頤祠會宜章寇亂郡僚相繼引去穎獨留寇平郡守奏
穎有協贊之功召對除太學錄初任郎召對者自穎始

遷太常博士光宗初遷左司諫屢疏請上問安重華宮
甯宗卽位除侍御史尋權兵部侍郎韓侂冑用事穎侍
經幃上曰諫官有言及趙汝愚者卿等謂何同列謾無
可否穎奏言天地變遷人情危疑加以敵人嫚侮國勢
未安未可容易進退大臣願降詔宣諭汝愚無聽其去
不報羣御史劾穎阿私罷太學生周端朝等六人伏闕
辨汝愚被誣且謂章穎言發於忠端朝等皆被罪自是
羣論遂起矣侂冑誅除集英殿修撰遷刑部侍郎尋升
禮部尙書乞去奉祠卒年七十八贈光祿大夫謚文肅

宋史

彭龜年字子壽臨江軍清江人七歲而孤及長得程氏
易讀之至忘寢食乾道進士授袁州宜春尉吉州安福

丞除太學博士遷國子監丞改司農寺丞進祕書郎兼
嘉王府直講光宗嘗親郊值暴風雨感疾久之疾平猶
疑畏不朝重華宮竈年以書譙趙汝愚且上疏言壽皇
之事高宗備極子道此陛下所親覩也況壽皇今日止
有陛下一人聖心拳拳不言可知特遇過宮日分陛下
或遲其行則壽皇不容不降免到宮之旨其心非不願
陛下之來自古人君處骨肉之間多不與外臣謀而與
小人謀所以交關日深疑隙日大臣所憂者外無韓琦
富弼呂誨司馬光之臣而小人之中已有任守忠者在
焉惟陛下裁察居亡何光宗朝重華都人權悅尋除起
居舍人述祖宗之法爲內治聖鑑以進他日竈年又奏
臣所居之官以記注人君言動爲職車駕不過宮問安

如此書者又數十矣恐非所以示後有旨幸玉津園龜
年奏不奉三宮而獨出宴游非禮也屬上視朝龜年不
離班位伏地叩額久不已血漬鬢鬢光宗曰素知卿忠
直欲何言龜年奏今日無大於不過宮光宗曰須用去
光宗崩甯宗受禪是夕召對甯宗蹙額云前但聞建儲
之義豈知遽踐大位龜年奏此乃宗祏所係陛下安得
辭尋除侍講遷吏部侍郎兼侍讀龜年知事勢將變會
暴風震雷因極陳小人竊權號令不時之弊遣充金國
弔祭接送伴使初朱熹與龜年約共論韓侂冑之奸會
龜年護客熹以上疏見紉龜年聞之附奏云始臣約熹
同論此事今熹既罷臣宜併斥不報迨歸見侂冑用事
權勢重於宰相於是條數其奸尋以煥章閣待制知江

陵府湖北安撫使乞祠以呂斐言落職追三官勒停嘉
泰元年復元官以待制寶謨閣致仕卒所著書有經解
祭儀五致錄奏議外制侂冑誅林大中樓鑰皆白其忠
詔贈寶謨閣直學士賜諡忠肅

宋史

楊解字正伯新喻人父沒盡以田園遜其兄紹興進士
吉水令歲饑亟發常平粟賑之累官司農少卿以直顯
謨閣知明州會海寇劫掠解捕禽之海道平改知甯國
卒子直清字叔裕永新令邑多強宗直清不爲撓竟中
飛語按驗無狀改知平陽

人物志

楊愿字謹仲申之曾孫銳志於學鄉之後進多出其門
年四十方登第官車輅院上章乞歸人稱壽岡先生爲
文典雅不尙艱深所著有壽岡集八卷

林志

嚴時亨字亨父新喻人隱居不仕師事朱子有疑義問

答往復書帖今祠學宮

縣志

謹案舊志作嚴世父白志存疑謝志據縣志改定從之

王光祖字仲顯臨江人孝友坦易喜讀書知衡陽受知

部使者辟守昭潭改瓊州嘗病廣右鹽法不便光宗卽

位以光祖爲提舉兩路鹽盡行公私便之卒於官

府志

楊扶字圖南新淦人性方介不苟合判袁州以爭訟事

忤郡將拂衣去官不復起自號竹溪居士胡忠簡周益

公皆與之游築室曰秀野忠簡爲之記

人物志

向士虎字伯虎子謹孫七歲時聞祖誦陶靖節詩竦聽

若有所得及登仕果無宦情授茂名尉及瓜代不忍去

親側志不復仕丞相周必大以隱逸薦不就適意賦詩

每有物外之趣自號桂隱散人有桂隱集

林志

彭鉉龜年次子以父澤錄用嘗爲甯都幹辦累知贛州
捐逋賦二十萬擢直寶謨閣湖南漕所著臨川可否錄

備寇議事錄

林志

李仲發新淦人幼孤事二母俱孝生母侯氏病革仲發
割股肉手熟以進母啜之愈有橘產於庭二本合幹楊
萬里爲榜於堂曰橘瑞謝諤記之侯氏沒萬里題其墓
曰李孝子生母侯孺人墓

縣志 白志舊案仲發林志
訛入元臨江府志承其繆所

敘橘瑞事亦
與此小異

曾三復字無玷臨江人乾道進士淳熙末爲主管官告
院遷太府寺簿歷將作太府丞紹熙初出知池州改常
州召拜監察御史進起居舍人兼權刑部侍郎以疾告
老詔守本官職致仕三復性耿介恥奔競故位不速進

在臺餘兩年持論不隨不激其沒也士論惜之

宋史
白志舊

案三復人物志以
爲峽江人者訛

曾三聘字無逸臨江新淦人乾道進士調贛州司戶參
軍累遷軍器監主簿有旨造划車弩三聘謂划車弩六
人挽之而箭之所及止二百六十步今所用克敵弓較
之工費不及十之三一人挽之而射可及三百六十步
利害曉然乃不果造光宗不朝重華宮中外疑懼三聘
以書抵丞相留正正未及言會以它事不合求去三聘
謂凡今闕庭之內父子夫婦之際羣臣莫敢深言者避
嫌遠罪耳丞相身退計決言之何嫌乎帝欲幸玉津園
三聘上疏言今人心旣離大亂將作小大之臣震怖請
命陛下安意肆志而弗聞知萬一敵人謀知馳一介之

使問安北宮不知何以答之孝宗病革復上疏言道路流言洶洶日甚臣恐不幸而有狂夫姦人託忠憤以行詐假曲直以動眾至此而後悔之則恐無及矣帝意爲動及孝宗崩帝疾不能執喪朝論益震洶三聘謂今日事勢莫若建儲甯宗立兼考功郎後知郢州會韓侂胄爲相指三聘爲故相趙汝愚腹心坐追兩官久之復元官侂胄誅諸賢遭竄斥者相繼召用三聘祿不及終不自言嘉熙間特贈三官直龍圖閣賜諡忠節

宋史白志舊案三

聘三復之弟新陰人史傳其明人文紀略正氣錄以爲吉水人者皆訛人物志旣以爲吉水人又以爲峽江人

見復重

陳琦字擇之清江人乾道進士初主衡陽簿辦雪冤獄賑荒郴桂糴無躡籍民甚德之後爲丞相留正辟主管

機宜文字在蜀二年事無鉅細多資焉卒於官琦爲人

明敏縝密雖嚴而恕能文善古律有克齋集藏於家

林志

韋楫字濟川清江人學極該博乾道五年乙科對策餘

二萬言知甯化縣倅房陵遷知宜州所至剖決無滯獄

祖有田廬悉以讓兄時清江上流有桐塘陂坑受大江

之衝壞民田二千頃楫按故法爲築隄防水五都之壤

皆爲上腴

人物志
統志林志

白志舊案韋楫明一
以爲常楫未詳孰是

朱景文字元成清江人自幼讀書過目不忘經史百氏

蒐獵該貫爲文立就雄贍豪爽如其人登乾道進士調

筠州司戶後調分宜簿未赴而卒

林志

劉誠之字子開少力學有大志乾道進士歷官州縣卓

有政績嘗爲吏部郎後出提舉浙東常平除直祕閣知

平江府平反冤獄人以比錢若水云弟性之字子仁登
乙科爲廣東經略司幹官時蠻獠猖獗性之奉帥檄督
捕直擣峒穴禽其酋長後爲荆湖制置司參議官擢知
峽州秩滿升監察御史終太府丞奉祠

人物志

蔡浩然字養正清江人乾道進士爲兩郡博士興學育
才郡臺皆器之改知安化邑抵溪峒素號難治視象未
幾去猾吏抑豪強溪峒悉安用薦授南安通判以疾奉

祠去

人物志

曾三英三聘第嘗考三國六朝攻守事迹著南北邊籌
八十卷又著蒙史

林志

劉荀字子卿清江人嘗從胡寅於新州又從張九成於
南安凡有得二公緒言皆筆之名曰思問記淳熙中知

餘干縣未滿適周必大入相以荀爲首薦改判德安知

盱胎軍所著有政規四十卷

人物志

曾三異字無疑三聘第少有詩名淳熙貢於鄉朝臣以

遺返薦召爲祕省校勘辭再召奏事除大社令力求去

號雲巢先生作墨戲爲世所稱著新舊官制通考通釋

等書

人物志

徐筠字國堅得之長子早歲擢第初主攸縣簿後知金

州乞免本州和羅郡人刻石記其事又肖像以祀嘗爲

漢官考四卷其餘若周禮微言姓氏源流等書皆藏於

家

林志

趙希循字良叔慶元進士嘗以漢書七論受知於真德

秀樓鑰監進奏院以疾辭時相惜其去慰勞甚勤後知

汀州除直祕閣奉祠有會心錄

林志

張洽字元德清江人從朱文公學自六經傳注而下皆究其旨歸至於諸史百家山經地志老子浮屠之說無所不讀時行社倉法洽請於縣貸常平米二百石建倉里中六年而歸其本於官鄉人利之嘉定元年中第授松滋尉改袁州司理參軍有盜黠甚辭不能折會有兄弟爭財者洽諭之曰訟於官祇爲胥吏之地且冒法以求勝孰與各守分以全手足之愛乎辭意懇切訟者感悟盜聞之自伏民有殺人賄其子焚之居數年事敗洽治其獄無狀俄夢有人拜於庭示以傷痕在脅翌日委官上其事果然知永新縣一日謁告聞獄中有哭聲蓋獄吏受財乘間訊囚使誣服也洽大怒亟執付獄以薦

通判池州時天大旱禱不應洽言於守請蠲徵稅催科以召和氣守爲寬稅三日果大雨以病請祠袁甫提點江東刑獄以白鹿書院廢弛聘洽爲長端平初除直祕閣主管建康崇禧觀以疾乞致仕卒年七十七平居不異常人至義所當爲則勇不可奪居閒不言朝廷事或因災變輒顰蹙不樂及聞一君子進用士大夫直言朝廷得失則喜見顏色所著書有春秋集注續通鑑長編事略厯代郡縣地理沿革表文集

宋史人物志白志舊案治諡文憲

傳實之字莊父清江人登寶慶第調分宜簿時祖母蕭氏壽百有八歲母楊氏亦八十餘蕭卒以嫡孫承重不赴官第謙之字溫父開禧甲子以春秋首選當陞對亦以母老不赴兄弟怡怡承歡一室文行爲鄉里所推學

者以南齋西齋先生稱之太守名其地爲慶壽里後以薦召言事獻八箴十事俱稱旨授承事郎所著有春秋幼學記南齋記

林志

蕭則字則山新喻人紹定進士以史館校勘遷武學博士進太府丞求補外遂奉祠得肆力於文字碑銘記序得盤詰體工篆隸凡名勝扁額多其所書尤善吟咏有大山集弟泰來字陽山登紹定第累擢監察御史有小

山集

林志

王選字少登清江人嘉熙進士授零陵簿東安盜起奉帥檄督捕盜平特差湖北帥幹尋改知醴陵生平力學飭行遠近師之

人物志

王札字季朋起家門蔭歷沿江制閫幕以能擢守竟陵

時襄陽失守郡當要衝兩被重圍竭力固守人皆效死

卒完城轉朝請郎以母老奉祠

人物志

陳茂濂字孟溪新淦人淳祐進士主新昌簿定版籍理稅畝邑黠吏有以賄恃勢誣邑屬者以法籍其家邑中肅然調郴州司理會文天祥領鎮湖南檄爲憲幕天祥移贛州濂攝幹官護視司事累官至從政郎歸老於鄉

林志

孔鑑字規祖臨江人少刻苦精於詞賦中年崇尚理學與修江李燠余宗傑爲友每爲一集質疑辨難剖晰精微後學宗之

林志

羅夢械字德玉新喻人寶祐四年特奏名授靖安尉庚申元兵入境夢械率民兵固守已而大至巷戰死之事

聞贈宣教郎蔭其子金鉉從政郎安志義傳有清江趙孟玖

者割股愈母疾有司以篤孝旌其門同邑尚有劉師

文新喻何從新詮郭林蕭大臨弟大受俱以孝義稱

徐卿孫字麟仲清江人景定進士才猷穎捷由善化主簿

憲官左正言薦李芾文天祥可共患難卒如其言林

黃祁字希宋清江人少孤力學自奮早以能賦稱郡博士

以其經明行修延入學宮為後進楷範累舉對策入

高等調高安簿時高安邑壯事繁令多分委予奪民德

之後歸老於家所著有德菴類藁三卷詩藁二十卷集

錄十卷林志

黎立武字以常新喻人咸淳進士授隆興判官歲饑同

僚請籍富戶賑貧民謂殺一牛以活萬蟻立武駁之曰

萬蟻固可憐一牛何罪而死眾稱善乃止累遷國子司

業文華閣待制考試臨川得草廬吳澄時稱其知人其

學宗白雲郭氏

人物志白志舊案吳草廬集元中子碑云年二十六擢進士第三人大父母

父母具存明年奉四親之官一時以爲榮累官至國子司業而宋亡傳中庸之學於新喻謝尚書平生著述悉

錄諸木今其書無一傳者

元

范梈字德機清江人家貧早孤母熊氏守志不它適長而教之梈天資穎異所誦讀輒記憶耽詩工文用力精深人罕知者年三十六始客京師有聲諸公閒中丞董士選延之家塾以朝臣薦爲翰林院編修官秩滿御史臺擢海南海北道廉訪司照磨巡歷遐僻不憚風波瘴癘遷江西湖東長吏素稱嚴明於僚屬中獨敬異之選充翰林供奉御史臺又改擢福建閩海道知事未幾移

古今有桃源漁唱集

吳文正公集

楊士宏字伯讓其先襄城人祖仲明以世官占籍清江
士宏嗜學工詩樂府著鑑池春草集及選唐音行世

統志

徐基字仕崇清江人得之裔早有才名吳澄示以爲學
之方元統間薦爲書院山長所著有玲瓏窗吟卷

林志

周自強字剛善臨江路新喻州人以文法推擇爲吏泰
定間廣西洞獠反自強往見獠酋說以禍福中其要害
獠酋立爲罷兵納款請命事聞特旨超授廣西兩江道
宣慰司都事轉饒州路經歷遷義烏縣尹周知民情而
性度寬厚不爲刻深民有以爭訟訴於庭者一見卽能
知其曲直未加刑責必反覆開譬之令其悔悟首實則

原其罪若怙惡不悛然後繩之以法不少貸民畏且愛
獄訟頓息民間田稅之籍多失實差徭不平自強出令
履畝覈之文簿井井可考於是賦役平均貧富樂業政
治大行部使者數以廉能舉於朝以江州路總管致仕
元史

杜本字伯原清江人博學善屬文江浙行省丞相呼喇
珠得其所上採荒策大奇之力薦於武宗召至京師未
幾歸隱武夷山中文宗在江南時聞其名及卽位以幣
徵之不起至正三年右丞相托克托以隱士薦召爲翰
林待制奉議大夫兼國史院編修官使者致君相意趣
之行至杭州稱疾固辭本湛靜寡欲無疾言遽色與人
交尤篤於義有貧無以養親無資以爲學者皆濟之平

居書冊未嘗釋手天文地理律厯度數靡不通究尤工於篆隸所著有四經表義六書通編十原等書學者稱爲清碧先生至正十年卒年七十有五

元史

張理字仲純清江人舉茂材異等官泰甯儒學教諭勉齋書院山長進福建儒學副提舉有易象圖說貢師泰序其書以傳季子定明洪武間以貢授行人奉使西蜀以清謹稱

人物志

裴夢霆字應祥清江人性孤潔嘗築室南郊儲書數千卷榜曰原南草堂日與郡人彭聲之楊仲宏輩講學賦詩時稱三鳳至正進士授江浙儒學副提舉未行壬辰兵變議集義兵備禦未幾卒

人物志

劉永之字仲修清江人少隨父宦游能文詞至正間與

楊伯謙等講論風雅當世宗之明洪武初徵至金陵以重聽辭歸性好書篆楷行草皆有法因自號山陰道士所著有山陰集石門集謹案縣志永之與墨莊異派舊志云其先許州人隨宋高宗南渡遂居清江又據曝書亭集錄其與梁寅論春秋書二千餘言後以子奉獲罪籍其家永之當徙萊州行至桃源病卒

蕭克翁新喻人燧四世孫隱居不仕學行爲州里所重李木魯翀從之遊稱爲純儒明一統志

彭鏞字聲之清江人龜年七世孫工詩與郡人楊士宏輩結社虞集見而奇之謂臨江詩道之盛它郡莫比性嗜酒號清江酒民所著有蕙櫟藁林志

劉天祐清江戍卒也元末紅巾賊起所過燔劫天祐陰結好義者合謀復城賊聞其名捕之急天祐與黨趨新

淦州舊無城樹柵自固朝夕與賊戰柵下以阜旗麾眾賊望而生畏相持踰十月糧盡突圍出賊追至江家墟馬陷於淖賊兵圍之天祐手刃數十人爲賊所執罵不絕口而死于六仁義禮忠德慶聞難皆死之郡人爲立

祠

安志

孔會心新淦人武仲八世孫至元閒官安慶教授守城城破不屈赴水死

林志

劉應樞清江人爲全州學正秩滿歸值壬辰之亂舉義兵爲賊所殺

林志

陳文彬清江人尹興國至正戊戌僞漢旣陷贛遣兵窺興國文彬初莅事率民固守凡再卻之城以全癸卯乃爲保障計繕墉堞浚城隍疏水環焉門有五舊無甕城

至是始備葺文廟講堂置尊經閣興文講學民不知爲

喪亂之世

劉槎翁集

江西通志卷一百四十四

列傳十一 臨江府二

明

黃惟宏字士能新喻人元季鄉貢士上猶教諭壬辰兵起惟宏閒道謁明太祖於洪州授江西行省郎中從大將軍鄧愈征贛道卒

人物志

練禧字伯尚新淦人工詩元末領鄉薦隱居不仕洪武初召爲起居注以直言忤旨謫廣德州同知遷汀州鎮

安二府通判卒於官祀鄉賢

明一統志練禧子簡之父謹案

周恆字道成清江人聰明嗜學通蒙古字書薦爲東宮伴讀丁外艱歸元末兵起郡城陷恆倡義師復之大府上其功授千戶江西失守落職洪武初預修禮書有槩

隱集

林志 謝志 舊案恆曾祖繪本開封人宋道熙間通判臨江因家焉子孫遂為清江人

胡行簡字居敬新喻人元至正進士國子助教歷翰林

修撰江南道御史洪武初徵至京與修禮書上憫其老

賜帛遣之

人物志

趙壘字伯友新喻人元至正中舉於鄉為上猶教諭洪

武二年詔修元史命左丞相李善長為監修官前起居

注宋濂漳州府通判王禕為總裁官徵山林遺逸之士

汪克寬胡翰宋僖陶凱陳基魯高啟趙汴張文海徐

尊生黃篪傅恕王錡傅著謝徵為纂修官壘與焉開局

天界寺取元經世大典諸書用資參考書成諸儒並賜

資遣歸而順帝一朝史猶未備乃命歐陽佑等往北平

采其遺事還朝重開史局仍以宋濂王禕為總裁徵四

方文學士朱右貝瓊朱廉

曝書亭集朱廉作朱世濂又有王廉

王彝張益

兼高遜志李懋李汶張宣張簡杜寅殷弼俞寅及堦爲

纂修官先後纂修三十人

曝書亭集作三十一人

兩局並與者堦

一人而已閱六月書成諸儒多授官惟堦及朱右朱廉

不受歸尋召修日歷授翰林編修高麗遣使朝貢賜宴

樂作使者以國喪辭堦進曰小國之喪不廢大國之禮

太祖甚悅命與宋濂同職史館濂兄事之出爲靖江王

府長史卒

明史

曾魯字得之新淦人年七歲能暗誦五經奉禮郎簡正

理欲以神童舉於朝其父不聽稍長日取三史記之尋

及其餘凡數千年制度沿革無不能言者遂以文學聞

於時洪武初召爲纂修元史官史成賜金帛以魯居首

乞還山會編類禮書復留時議禮者蠶起魯引據經典以折眾難尋授禮部主事開平王常遇春薨高麗王遣使來祭魯欲觀其文使者靳之魯固欲觀使者不得已出之外襲金龍黃帕文不署洪武年號魯讓曰龍帕誤耳納貢稱藩而不奉正朔君臣義安在使者謝過命易去乃已安南陳叔明篡其主日熒位懼討遣使入貢以覲朝廷意主客曹已受其表魯取副封視之白尚書詰使者曰前王日熒今何驟更名使者不敢諱具言其實帝曰曷夷乃狡獪如此邪卻其貢不受由是器重魯嘗問丞相魯今何官對曰主事耳即日超六階拜中順大夫禮部侍郎未幾命主京畿鄉試甘露降鍾山羣臣以詩賦獻帝獨褒魯是年十二月引疾歸道卒滄安徐尊

生嘗曰南京有博學士二人以舌爲筆者曾得之以筆爲舌者宋景濂也魯所作不留藁其徒聞有所輯錄亦未成書云

明史列卿錄

蕭伯辰清江人知深州城郭卑洿多水患伯辰先徙民之耆稚官府之圖籍置高原具舟編筏以待之民免於災其廨亭廬舍無復完存政治無所乃卽避水地芟蕪剗翳相其爽塏以縣絕從事已乃請於朝建州治民至今賴之升南刑部郎中

直隸通志

張美和名九韶以字行清江人元末累舉不仕洪武三年以薦爲縣學教諭遷國子助教改翰林院編修致仕歸帝親爲文賜之復與錢宰等並徵校書書成遣還

白志

聶鉉字器之清江人洪武進士爲廣宗丞疏免旱災稅

秩滿入覲獻南都賦及洪武聖德詩授翰林待制改國子助教遷典籍與同邑張美和同賜歸十八年復召典會試欲留用之乞便地自養令食廬陵教諭俸終其身

時稱成均三助謂鉉與美和及嘉興貝瓊也

白志

陳公達清江人洪武初知餘姚廉謹慈愛不任威刑察

民疾苦力與祛刷均田準役無不稱平

浙江通志

王選新喻人洪武初舉明經大理評事永樂中與修五

經四書性理大全

人物志

金固字守正新淦人四歲母授五言詩能誦之既長遂

通經史百家之言與同郡梁寅劉永之輩爲友邵太守

知其賢聘爲學訓導講明道德性命之旨士子翕然歸

之稱雪崖先生子幼孜別有傳

人物志

黃桀字體方新淦人洪武中稱十才子後徵至京爲周王府伴讀取古詩數萬篇求其渾然天成之句錄爲一帙而附以已作命曰詩海珊瑚

人物志

王友仁字仲義清江人明程朱易義兼工詩文爲人端恪不急於進取所居名思齊齋

梁石門集

梁寅字孟敬新喻人世業農家貧自力於學淹貫五經百氏累舉不第辟集慶路儒學訓導居二歲以親老辭歸隱居教授太祖徵天下名儒修述禮樂寅就徵已六十餘矣時以禮律制誥分爲三局寅在禮局中討論精審諸儒皆推服書成賜金帛將授官以老病辭還結廬石門山四方多士從學稱爲梁五經又稱石門先生

自志

張敬字子儀新淦人洪武鄉貢莆田縣學教諭深心古

學名重一時國子祭酒吳溥雅重之遣子與弼遊其門累官南京國子博士卒贈南京刑部員外郎所著有五經膚見四書訓注等書子魁數各有傳

人物志

周愼字仲瑾新喻人洪武鄉貢業成均貼黃內府太祖一見奇其貌明日召拜御史不三年升僉都御史時廣西奉議龍州土官王世鐵梗化命征南將軍楊璟等討之愼與蕭玉成隨軍紀錄蠻獠平立奉議南丹二衛多出愼謀奏凱還勞賜金帛命掌院事卒於京

人物志

徐敬字敬仲清江人洪武中以國子生授監察御史直言不同兩黜爲令一謫戍邊載厯春坊始終一節及守太平寬猛相濟水旱禱輒應秩滿民懇留之詔加三品俸掌府事以母老乞終養歸

林志

胡器字士連新淦人貢升太學授雲南普安府通判擢
泉州知府綽有惠政每判死刑恆鬱鬱不樂或問其故
曰吾爲民父母不能化民以德政乃致民死地邪倉庫
火風猛眾莫能措器稽首火尋滅永樂初與修書內閣
升貴州按察使尋召爲國子祭酒兼攝通政事致仕歸

人物

志

胡雲端字騰霄新淦人胡忠簡公裔也洪武初以貢舉
聘修元史後廷試第一官禮部儀制司主事定禮儀議
嫡庶升降服編孝慈錄稱旨遷浙江副使以疾乞歸子
子持仕至河南按察司僉事正統初爲督學有聲從子
子泰吏部文選司主事

人物志

陳永年新淦人洪武末由給事中出知惠安縣螟螣生

永年禱於城隍有頃鳩鵲蔽天羣啄食之歲乃獲

人物志

謹案志作
陳永言

周魯章字文瞻新喻人通左氏春秋洪武末以明經徵授文選主事辭以疾上賜蓑笠俾歸教民稼穡因號明

農隱逸

林志

傅孟素新喻人洪武中舉明經以親老辭歸郡守欲辟爲掾笑曰昔以母老辭官今豈能爲吏邪不就子玉良王潤同登永樂進士玉良觀政刑部有孫姓者驅車入城碾女子死法司擬償玉良力爭以爲初無殺人之意竟得減論授常熟知縣玉潤政和知縣以伉直免官

人物志

吳嘉靜新淦人通詩書二經洪武末薦授訓導累官刑

部員外郎永樂中與修五經四書性理諸書大全

林志

傅舟字子楫清江人洪武末鄉貢蘄州學正永樂中與

修五經四書性理大全

林志

練子甯名安以字行禧之子英邁不羣洪武十八年廷試一甲第二授翰林院修撰歷遷工部侍郎建文初與方孝孺並見信用改吏部左侍郎拜御史大夫燕師起李景隆北征屢敗召還子甯從朝中執數其罪請誅之不聽叩首大呼曰壞陛下事者此賊也臣備員執法不能除奸死有餘罪因大哭求死帝爲罷朝燕師旣渡淮靖江府長史蕭用道衡府紀善周是修上書論大計指斥用事者書下廷臣議用事者盛氣以詬二人子甯曰國事至此尚不能容言者邪詬者愧而止燕王卽位縛

子甯至語不遜命斷其舌曰吾欲效周公輔成王耳子甯手探舌血大書殿輒曰成王安在血入於輒滌之不滅遂磔之族其家姍戚逮死者百五十一人戍邊者三百七十一人子甯死時侍婢抱一歲兒匿民間得免萬厯閒練綺者兒六世孫也或曰妾秦有娠生子戌所名善慶云女瓊入浣衣局宣德元年收赦歸適儒生子甯從子大亨官嘉定知縣聞變同妻沈劉家河死妾將產匿民家生子易姓侯遂爲嘉定人子甯善文章方孝孺稱其多學而文宏治中王佐刻其遺文曰金川玉屑集提學副使李夢陽立金川書院祀子甯父子名其堂曰浩然福王時贈太保都御史諡忠貞

國朝賜諡忠肅大亨諡節愍

明史列卿錄
勝朝殉節諸臣錄

徐子權新淦人洪武進士官刑部主事聞練子甯死慟哭賦詩自經死福王時贈光祿卿諡忠愍

國朝賜諡節愍

白志勝朝殉節諸臣錄

謝子襄名袞以字行新淦人建文中由薦舉授青田知縣永樂七年與錢塘知縣黃信中開化知縣夏升並九載課最當遷其部民相率訴於上官乞再任上官以聞帝嘉之卽擢子襄處州知府俾得治其故縣子襄治處州聲績益著郡有虎患歲旱蝗禱於神大雨二日蝗盡死虎亦遁去有盜竊官鈔子襄檄城隍神盜方闕鈔密室忽疾風捲墮市中盜卽伏罪叛卒吳米據山谷爲亂朝廷發兵討之一郡洶洶子襄力止軍毋出而自以計掩捕之獲其魁餘悉解散厯官三十年不以家累自隨

二十二年卒

明史

金幼孜名善以字行新淦人建文進士授戶科給事中成祖卽位改翰林檢討與解縉等同直文淵閣遷侍講進春秋要旨三卷遷諭德兼侍講七年從幸北京八年北征幼孜扈行所過山川要害輒命記之幼孜據鞍起草立就嘗失道陷谷中明日始達行在所是夜帝遣使十餘輩迹之比至喜動顏色自後北征皆扈從十二年遷翰林學士尋拜文淵閣大學士二十二年幼孜與楊榮從北征次開平帝曰朕夢神人語上帝好生者再是何祥也榮幼孜請班師帝然之卽命草詔招諭諸部還軍至榆木川帝崩祕不發喪榮計京師幼孜留行在以待太孫至仁宗卽位拜戶部右侍郎兼文淵閣大學士

尋加太子少保兼武英殿大學士專典內制賜繩愆糾
謬銀章諭政有闕失密疏聞用此識洪熙改元遷禮部
尚書兼大學士學士如故並給三俸命與士奇榮會獻
法司囚幼孜善律法多平反尋乞還省母母卒起復爲
總裁官修兩朝實錄宣德六年卒贈少保諡文靖

明史
列

卿
錄

杜觀字公儼清江人嘗痛其父早世作思嚴堂以示不
忘廬陵曾榮同郡金善俱有文記之永樂元年以春秋
領鄉薦任太平府儒學教授與修五經四書性理大全

人物
志

張徹字玉瑩新淦人永樂進士改翰林庶吉士累官吏
部考功郎中性剛介時稱爲鐵板張謝病歸二十餘年

唯閉戶讀書所著有退軒集

人物志

孫郁字勝文清江人永樂閒以監胄與選風憲官御試高等除刑科給事中奏讞疑獄數十人駕將北征當扈從以營寮友喪失班坐謫桂陽州判在桂雨暘應禱怪石倚江爲險祈雷震之如響民立祠祀之升雲南五井鹽課提舉致仕歸家居督耕而食自號歸耕叟壽百歲卒

府志

黎恬字潛輝清江人天性孝友儀度端凝永樂進士授陝西道監察御史會求直言遂疏詆大臣不法權要側目出知交趾南靈州尋以楊士奇薦擢諭德與修宣宗實錄進講經筵以展墓歸卒所著有觀過彙

人物志

陳孟浩新淦人少貧刻苦志於學永樂進士長沙儒學教

授改蘇州俗尚浮靡約令敦實周忱禮重之秩滿疏留

加秩仍掌學政引年歸

人物志

習嘉言名經以字行新喻人永樂進士改翰林庶吉士授編修與修經世大典通鑑直解宣德改元命修兩朝實錄及君臣故事正統初與修宣廟實錄遷侍講擢太常少卿轉詹事府詹事沈毅莊靖爲上所眷重卒諭祭

葬

人物志

盧滋字玉潤新淦人邑掾滿歲莅事選部尚書蹇義奉命擇天下郡守召滋與議奏上稱旨成祖詰之義以滋與議對授文選司主事進員外郎出知杭州府會宦者違禁織造龍服滋劾之論死留杭十八年遷廣東布政

卒

林志

胡器字季楠新淦人永樂進士監察御史按江淮斷疑獄數十民爲之語曰刑不及膚德入於心詔嘉之未拜

命卒

府志 白志舊案明初新淦有兩胡器

劉翔字虛谷清江人宣德鄉貢衡山縣儒學教諭遷國子學錄景泰初上中興詩及神禹成功洪範九疇二雅請立宗廟以準古七廟制事下禮部憲皇登極再疏宜建七廟各具樂章郊祀視學慶成皆當作雅樂革元舊製上召至文淵閣命與大學士李賢議翔曰禮樂百年可興茲其時矣事竟寢成化閒致仕

林志

張固字公正新喻人宣德進士刑科給事中遷大理寺少卿出鎮四川會山東饑盜起命往賑之英宗復辟固已卒追念諫止北征忠盡遣行人劉恕論祭蔭一孫子

黼字良伯景泰進士監察御史有直聲歷官廣西按察

使

人物志

張敦字廷學新淦人正統鄉舉授監察御史歷仕兩朝奏進律解比例軍政條例俱準行遼地素艱水相地鑿井得泉民德之立祠祀焉按浙嚴溺女之禁遷廣西副

使因忤權貴歸休

人物志

盧秩字崇績新淦人景泰進士監察御史遷湖廣副使會廣西徭賊劫掠郴桂勒兵出其不意破之旬日平事

聞遷貴州按察使

人物志

吳匯字會川新喻人家貧力學嘗取松明代膏火學者多師之景泰辛未會試第一官至國子司業

長志

胡榮字希仁新喻人自少遊心理學景泰進士歷給事

中兩督浙江廣東學校以參政致仕所著有道器圖東

洲棗

林志

彭烈峽江人官御史偕楊瑄張鵬諸御史同劾石亨曹

吉祥被謫江浦知縣有善政憲宗嗣位擢知河南府官

至廣東左布政使

明史楊瑄傳

傅瀚字曰川新喻人天順進士選庶吉士除檢討嗜學

強記善詩文遷左諭德直講東宮孝宗嗣位擢太常少

卿歷禮部左右侍郎尋命入東閣專典誥敕兼掌詹事

府事宏治十三年代徐瓊爲禮部尚書保定獻白鵲疏

斥之陝西巡撫熊翀以鄠縣民所得玉璽來獻以爲秦

璽復出也瀚率同列言秦璽完毀具載簡冊今所進璽

篆紐皆不類蓋後人倣爲之且帝王受命在德不在璽

太祖制六璽列聖相承百三十餘載天休滋至受命之符不在秦璽明矣請姑藏內府帝是其言薄賞得璽者京師星變地震雨雹四方多變異瀚請躬行節儉以先天下光祿寺通行戶物價至四萬餘兩瀚言由供億之濫願敦儉素俾冗費不生十四年卒贈太子太保謚文

穆明

何衷字惟孝

一作惟恭

新淦人

一作江人

天順進士刑部主事

進員外郎會四川巡撫都御史與鎮守總兵許奏廷議

推衷往訊比至懼罪者賂千金斥之卒正其罪中都留

守笞人死按治久不決衷訊之伏誅遷南京大理右寺

丞

林志

周謨字守謨新淦人爲庠生時嘗推廩祿以遜其友天

順進士累官陝西副使以母老乞歸邊民番夷老幼相

泣不忍舍所著有樂舉集

林志

何純字惟一新淦人成化進士授庶吉士改監察御史時大臣有不厭望者純疏其過三上不報尋升雲南副使兵備臨安先是阿彌州賊刁蕃叛交人遂侵河純捕斬蕃建議置千戶所巡檢司守禦會有欲增臨安銀課者純奏鑛少民貧課不宜增皆從之

林志

孫治字五美清江人成化進士知臨淮縣守已愛民興學作士時權閹汪直陳廣以選妃責貢繼至所在需索動以下計治持正不阿竟爲二宦所中改安東遂棄官

歸

林志

戴中字師中新淦人成化進士宰黃梅有惠政召爲御

史按河南值水荒賑活百萬言事忤旨謫判雅州宏治

初起山東僉事遷兵備副使

人物志

蕭子鵬字宜冲新淦人居家以孝友稱師事吳康齋與

陳白沙張東白友善宏治元年徵遺逸銓部欲授有司

懇辭乃補嘉興府儒學訓導所著有雪邱集

林志

何善字惟吉新淦人成化進士新城知縣邑素苦水暴

浥禾善令築隄防濬溝渠水不爲患歲侵賑粟不待報

吏難之叱曰民苟活吾何避罪擢刑部主事

林志

熊正字正己清江人成化閒貢入太學永瀆知縣旁邑

富民有毆殺一家三人者獄久不決事下永瀆按正核

實獄成上下服其明允

人物志

彭綱字性仁清江人成化進士授兵部武選司主事遷

員外郎上封事劾妖僧繼曉出知汝州鑿渠引水灌田數千畝世爲民利擢僉事遷河南雲南提學副使以公明稱爲人端凝樸茂後進多程式之

人物志

孫仁字偉德新淦人成化進士歷官刑部郎中審錄湖湘多平反出守常州忤中官王敬逮繫詔獄都御史王恕疏仁冤詔寘敬於法累遷河南左布政使會河決爲患蘭陽諸邑仁設方修築賑濟已而決張濟又決張秋與侍郎劉大夏同濬治以功進左副都御史巡撫甯夏疏請富民輸粟權鹽以足儲餉邊鄙賴之休歸疾終遣

官祭葬

人物志

鄧槩字冠卿新淦人成化進士令永安遷都察院都事劾內豎韋興謫知資陽升瓊州同知會都御史劉大夏

征黎命槩守臨臬賊不敢犯擢廣東僉事劉瑾專權罷

歸府志

敖毓元字化潛登進士第成化中星隕求直言毓元上疏四事慎選大臣慎選臺諫佛老當去名器宜公時李孜省僧繼曉輩用事毓元語多指斥疏入謫雲南臨西丞孝宗登極起知桂陽竟以直坐事卒

人物志

陳壽字本仁新淦人成化進士以都給事中升大理寺丞累官南京副都御史南京科臣劾逆瑾被逮壽抗疏救諸言官瑾怒奪職以薦起巡撫延綏火篩犯境以捍禦功遷南京兵部侍郎九上疏乞休升南京刑部尚書致仕居官不治產業既罷無所歸僑寓金陵以壽終

林志

謹案明史壽本傳其先新淦人祖志宏洪武間代兄成遠東遷籍甯遠衛壽後歸葬新淦

干顯偲新淦人六歲失怙踰年求父像時拜且哭家貧事母盡孝養比葬廬墓所虎馴其側正德三年旌表子

鳳宏治鄉薦知桃源縣卒官

林志

黃流新淦人早喪父其母患噎疾醫弗效日夜禱神求以身代一日母思粢餌忽餽自鄰家食之疾愈流往謝

鄰言無之人以爲孝感淦之言孝行者以干黃並稱

林志

符觀新喻人宏治進士授溧陽

白志謝志並誤深陽佞府志改

知縣種

蔬解勞掘地得金報所部易粟賑饑升辰州同知改黔

陽澈浦辰溪三學升廣西兵備僉事歷浙江山東參議

請老歸

人物志

符錫觀子宏治鄉舉判韶州翁源賊李英誘九連山寇流劫境內錫督兵會討破之獲李英郡中驛傳科擢議

徵銀發驛至今便之後以太僕丞擢知本府

廣東通志

何正字立經新淦人宏治進士大理評事遷寺副會隆平侯爭襲事下正按於是逆豎瑾陰有所左正不從竟罷歸瑾誅起爲河南僉事平河洛寇擢山西副使乞疾詔進按察使致仕

人物志

陳陽字健夫新淦人宏治進士選庶吉士授刑部主事奉命讞獄南畿有持千金陰祈末減者陽拒之竟置於理進郎中蘇常有獄久不決命陽往按逆瑾受賂欲貸之弗從遂誣下詔獄杖於朝門左謫雲南昆明州同知瑾誅升廣西僉事以劾監司不法左遷運同卒於官

林志

黃繡字文卿清江人宏治進士授兵部主事駐劄山海

關諸兵飭備有裨邊政升員外郎尋升山東僉事歷副使參政督修闕里文廟宸濠之變王守仁舉勤王師知

繡魁壘多智聘至軍中計事年六十五卒

人物志

張芹字文林陝江人舊志作新淦人宏治進士授福州推官正

德中召爲南京御史疏斥李東陽東陽涕泣不能辯帝

責其沽名停俸三月給事中竇明言事下獄疏救之出

爲徽州知府改杭州復還徽州察民便宜務與休息賞

捐俸并郡中引價金置六邑義田備荒民呼其田曰廉

惠田遷浙江副使歷參政布政使以事罷歸

明史人物志

孫偉字朝望清江人宏治進士授南京工部主事升郎

中上疏言時事十六條詞甚剴切守鶴慶會土官高才

怙勢煽亂偉索之急才計窮悔禍乃止解仕歸居家孝

友待宗族無論疏戚樂施予尤喜推引後學

人物志

涂禎新淦人宏治

謝志誤成化

進士初爲江陰知縣正德初

巡鹽長蘆劉瑾命其黨畢真託取海物侵奪商利禎據

法裁之還朝遇瑾止長揖瑾怒矯旨下詔獄江陰人在

都下者謀斂錢賂瑾解之禎喟然曰死耳豈汙父老哉

竟弗許遂杖三十永戍肅州創重死獄中瑾怒未息取

其子樸補伍瑾誅樸乃還禎復官賜祭

白志

敖英字子發號東谷清江人正德進士授南京工部主

事遷祠部郎督學陝西河南歷仕藩臬所至聲望著聞

以四川右布政使致仕英在當時盛有詩名人稱之爲

敖清江自爲督學慨然以力崇師道興起文教爲任正

色盛氣人不敢干以私惟與羅洪先鄒守益善講學相

資獎掖後進里居十餘年著述日富有綠雪亭心遠堂

等集

人物志

胡連字重器

一作美

新喻人正德進士官刑部郎中嘗諫

武宗南巡受杖嘉靖三年偕廷臣伏左順門爭大禮杖

三十踰旬再杖之病創卒穆宗嗣位贈太常少卿

明史

張深二傳

謹案白志胡連傳僅據明史張深傳未

字

張文字堯冕新淦人天資篤實與餘干胡敬齋辨論甚

多如太極辨性善等說皆出獨見所著有易經五贊解

四書發明西洲藁

林志

白志舊案同時有兩張文一

所建白林志人

物志皆不載

聶仕字本學清江人正德鄉貢漳州府通判平海劇寇

所獲金帛悉籍於官視郡篆反風滅火禱雨濟旱以父

喪感疾卒

人物志

謝階字立升新淦人正德中除行人選御史彈劾無所
避升大理知府民病取石伐大樹塞其谷再守建甯致
仕卒年八十八

人物志

聶璜字鳴卿清江人正德鄉貢授常德通判監司愛其
材事有艱鉅輒檄使佐理再補黃州平寇羅田有功升
順德同知三月卽引疾致仕家居十餘年郡中稱長者

人物志

簡霄字騰芳新喻人正德進士授石首令歷官大理丞
平反有聲擢僉都御史巡撫河南進南京副都提督操
江升兵部右侍郎奉命護慈孝獻皇后南祔顯陵尋乞

歸卒所著有蓉溪集

府志

簡佐字臣心新喻人少有神童之目年十二冠多士御

史何公召賦清風樓大奇之正德中舉進士官至太僕

卿以建言左遷長史

府志

劉纓字與清新淦人進士巡按閩中有沙縣民陳富謀

妻姪劉釗產爲匿名書誣釗父並及釗所親獄已成纓

密察釗父實以負債自刎論富如法莆田民有隨母出

嫁而刎股療其繼父者有司以孝聞纓曰虧父體以濟

父仇可謂孝乎仕終刑部尚書

福建通志

吳琳吳琅新喻人幼並力學兄弟相友愛父坐事謫廣

川驛琳請代父及父卒琅又請代琳歸治喪事琅後病

歿於廣川琳聞大慟適從父收琅骸骨歸琳以禮葬撫

其孤過於己出

安志

蕭質清江人正德鄉舉知遂昌省刑薄斂民有爭者諭而遣之時巡按使者至邑見獄中草長過膝深加歎賞

浙江通志

施政字長尹新喻諸生性醇樸母羅氏歿哀毀骨立事父彰憲孝謹朝夕省視具冠服食餌親嘗衣垢必自浣父百歲卒廬墓有司議乞旌表政固辭縣令題其居曰

孝子門

安志

廖俊新淦人進士正德閒以工部郎中升運司同知居官清廉貧不能歸寄籍山西著有河東漫興集

山西通志

蕭亮新喻人諸生長韜略正德五年華林盜起殺副使周憲勢甚熾亮奮勇破賊寨生禽其魁數人復率眾追

賊失援遇害都御史陳金遣官祭之事聞詔賜絹鈔從祀周節愍祠并錄其子長孺

府志

龔亨字有孚清江人正德進士授刑部主事擢僉憲貴州時蜀中番部攻剽轉掠黔中當事議撫亨曰番人無信不一創撫不可圖也遂率眾深入箐峒蕩平之蒲兵臨安地鄰交趾多盜禽渠魁斬首六人邊境晏如丁內艱補廣東副使歷秦楚二藩擢巡撫河南歲饑檄諸路發粟全活數萬人奏減河夫積負尋解官歸杜門謝客以文章自娛臨卒自爲志狀

人物志

黃仁山字元靜新淦人正德進士授刑科給事世宗沖齡承大統宦官黃玉趙綱居中用事凡大政悉就咨決仁山首發其姦狀戚畹陳萬言嘗規造私第欲借各邊

銀二十萬兩已奉俞旨復上疏中引寶霍奢僭欲其淡泊自全時論壯之會大禮議起上意欲尊崇獻王廷臣互相甲乙仁山專主大學士楊廷和議欲如漢定陶王宋濮安懿王故事出爲嚴州守未幾謫丞西安遷西安令太倉知州改馬湖同知乞休卒

人物志

吳達字近光新淦人嘉靖進士授兵部主事以母老告改南疏魏國公飢法害民數事詔奪魏職升興化知府單車入郡歷三載篋無餘貲升四川副使兵備達州興

御史忤遂歸

人物志

蕭文明字時化新喻人嘉靖開鄉貢初授五河知縣邑苦河患捐俸遷築城垣改昌平知縣邊警至文明督軍民戰且守城得不破調嵩明解任歸究性命之學所著

有二程粹言象山語略南中錄府志

敖璠字貴之新喻人嘉靖進士授刑部主事歷郎中恤刑兩浙多平反升兵備副使整飭蘇松會有海寇躬率義兵亟捕剿之撫臣上功有金帛之錫任山東參政踰年卒府志

傅鶚字文瑞新喻人登進士歷官御史巡按湖廣以風力見稱坐與大學士嚴嵩忤疏乞終養人物志

王貴字道充清江人嘉靖鄉薦少從王守仁湛若水學授湖州府同知升南刑部主事轉鹽運司同知致仕卒

人物志

蕭鳴邦字子和清江人由鄉薦任東昌府通判轉開封同知皆管河道會九廟工起荆蜀巨材阻於冰請俟冰

開以濟詔從之逆賊師尚詔擾河南奉檄守太康身冒矢石卒完其城遷工部郎中轉雲南僉事平武定土酋之亂致仕歸府志

曾樂字思韶新淦人嘉靖鄉薦授南雄府推官署東莞多惠政癸卯分校省試首拔倫文敘時稱知人守賓州招降劇寇臺使上其功入爲工部員外郎以疾乞休人物志

高翀字允升峽江人嘉靖進士歷隄爲溧水東鹿三縣令人爲工部員外郎擢浙江參議蒲臬巡撫貴州以征苗功進階工部尚書致仕府志始改峽江書峽江籍斷自州始

杜欽德字子敬清江人嘉靖舉人從呂涇野黃久庵講

學金陵任兩淮運判建五港間復安東舊屯商民便之
尋知雅州茶商歲苦天全六番爲暴檄招討司嚴番禁
歲饑民賴賑活者眾立祠祀焉

人物志

饒思聰字子開新淦人嘉靖進士由司理擢刑部主事
歷官福建布政使卒於家思聰少負將略喜譚邊事與
中丞曾銑齊名歷仕藩牧十餘年三殲巨寇再疏漕河
屢詔優賜鈔幣

人物志

蕭克良字以達新淦人由鄉薦爲汶上令先是兗諸邑
多寇盜克良悉捕置之法邑人韓克儒等七人爲大賈
讎構繫獄一訊立白其冤秩滿請告歸辛酉流寇徧淦
城悉散家財結死士擊走之淦賴以安

府志

朱瓚字克獻新淦人嘉靖鄉薦性孝友兄弟皆早卒撫

其子如已出由睢甯教諭補武昌令調麻陽苗賊入寇
遠近大震瓚集父老諭之曰苗歲爲麻陽害今乘我新
至亡備當出不意擊之民皆鼓勇先登俘斬百餘級苗
遂宵遁以積勞遺疾卒

府志

張緒字卿理峽江人嘉靖進士授翰林檢討嚴嵩方爲
宰執雅慕緒名緒卒不詣其門出爲湖廣參政提督太
和山緒不欲與寺人伍疏請中官治山事分守理民事
獲允著爲令尋以副使備兵貴州安宣慰負固日久論
以大義安感泣願立功自贖時苗寇猖獗緒遂遣將合
安眾破之平霸威清諸處多虎患爲文禱於廟俄虎自
相搏噬死在黔數年功績茂著卒以嵩故被論歸

人物志

熊達字子漸清江人嘉靖進士授刑部主事歷官廣東

廉使會粵寇張連僭號達條陳兵食大計卒獲成功遷
浙江布政使浙方多事帑藏空虛乃剔貪冒清逋負籌
畫有方適胡宗憲敗眾慮客兵為變達大發芻粟犒之
反側以定

人物志

劉松字汝貞新喻人嘉靖進士官刑部郎中時徐學詩
劾宰臣嚴嵩專擅疏橐出松手嚴頗銜之以忌引歸年
甫三十隆慶中郡守管大勳同修郡志所著有羅川遺

橐

人物志

饒鳳詔字應宣弟鳳儀字應禎新淦人少以友愛稱鳳
詔尤刻意古學以貢入南雍領嘉靖鄉薦鳳儀亦省試

獲雋御史建坊榮之

人物志

黃元成字梅塘峽江人嘉靖鄉薦署曲江教諭升武康

令會大饑廩且竭元成請於上自署其牘有云嬰兒嘸
飢不飽不止慈母愛子亦怒亦憐當事奇其語遂得賑

府志

曾廣翰清江人由明經授岑縣令猺獍相率歸化以憂
去再補大埔縣追回各縣侵田以千計遷廣州府通判
督餉平番有功進階致仕

府志

彭惟享字子成清江人龜年之後少有才譽嘉靖鄉舉
授嚴州司理不事擊斷每論囚輒反覆以求其生擢兵
部職方郎巡閱禁旅備禦悉中機宜以勞卒於官

府志

邊毅字德宏一字南岡峽江人嘉靖進士爲台州推官
擢南臺御史疏論時政屢忤權貴或諷以少遜言益力
一日宰臣嚴嵩自出慰勞臺臣欲啖以無言謂毅曰君

何靠曰某靠天時京師有靠天邊南岡之謠坐忤出守湖州再謫判廣德補宣城令稍遷大理評事轉刑部郎

卒

人物志

劉正亨字謙夫新淦人由舉人署浦江教諭轉興甯知縣會猺獠出沒剽掠禽其渠帥楊子常餘黨悉定調贛榆升河池知州俗濱苗男女無別正亨修學校明禮教苗俗化之遷温州同知禦倭有功郡守陰中之左遷言

府長史

人物志

萬育高字民仰新喻庠生性至孝父疾籲天請代及沒廬墓三年嘗侍母過外家遇盜育高抱母請代死弟民望又抱兄首以代盜感而併釋焉

安志

楊翬清江人以貢授平海衛學訓導仕終吉府教授親

歿嘗作噬臍錄以志思慕環堵蕭然言動以古人爲法

有四書讀法五經辨疑諸書學者稱之

府志

徐雲程字允升清江人嘉靖進士授禮部主事隆慶改元大禮多出裁定出僉憲河南升浙江按察使嘗築麗水隄民賴其利解散金衢礦徒以持法忤直指遂乞終

養

府志

晏仕翹字應望清江人嘉靖進士松江府推官時華亭徐階爲首輔有司過其門者輒下車晏持不可擢監察御史有薛運使者恃江陵嬖黨貪橫疏劾之坐忤出爲郡尋謫滁州判官升知太倉州卒

人物志
志仕翹新喻人
謹案縣

蕭承命字性甫清江人嘉靖四十四年任廣東東莞縣典史方五月惠寇流劫邨落會攻城承命督兵拒敵賊

多兵寡與百戶王詵

安志作王詵

血戰死之

謝志

鄧以和字履之新喻人嘉靖鄉貢爲海南知州洗剔巨姦特建水陸二營倭不敢入政績著聞升甯國府同知

以忤嚴世蕃致政歸

謝志

張春字仁伯新喻人嘉靖丁未廷對第二人授翰林編修升侍讀充裕王府講官撰經書格言以進深蒙嘉納書進思啟迪四字賜之時嚴嵩當國惡其切直又以開館講學觸忌調南太僕丞穆宗慰勉泣別春行至滁州挂冠歸築講堂二曰忠孝曰友仁日與四方學者闡發頁知從遊者眾穆宗立故講官唐汝楫等約春入賀以恐涉干進辭不與會穆宗詢及春司禮太監馮保以春教習時督之嚴以物故對嘆息久之及張居正爲相復

以手書徵亦不答家居二十年卒春少從歐陽德遊深

研理學在禁庭忠直蹇諤扼於權倖奉身而退其學有

所得故脫屣榮祿如此

府志

謝志舊案前志據明史稿以春乃嚴嵩義子不當混列

人物遂削去春以忠直犯嵩忌挂冠三十年惟恐一毫失節涉於干進為嵩義子者如此乎今仍補入以俟識

者論定云

謹案

欽定明史無張春

傳新修縣志與前志同仍載謝志原案存疑

周安叔字于盤新淦人以明經司訓台州轉蘇州府教

授教士分經義時務二科人以比胡安定冢宰陸汴給

諫王亮御史黃鍾徐申輩皆所獎拔尋擢銅仁司李時

值饑荒土司煽亂至即撫定之孫一松辛未進士以文

名

府志

黃應用峽江人家貧奉親必盡甘旨父疾請以身代父

果痊後九年始卒母病臥牀偶火災應用擁榻哀號返

風滅火人咸異之卒年八十子一鳳登進士

安志謝志舊案同

時尚有清江蘊紹博新淦鄧國材峽江邊一楮俱見安志孝義

劉汝順清江人嘉靖鄉舉知黎平府奉法循理苗民初不知學汝順請於學使拔其秀者爲弟子員以獎勵之五開衛軍糾眾跳梁自以爲別屬不可治汝順密陳其不法狀盡按治之郡中乃平府稱軍民始此

貴州通志

朱連字文卿新淦人登進士爲崇安令治行循卓召拜御史巡視長蘆鹽課巡按湖廣秩滿轉南畿督學使稱得人尋升副使歸

貴州通志

胡叔廉字明發新淦人嘉靖進士爲臨海令會颶風民多死暴骨海濱叔廉悉掩而祭之便宜發倉躬詣災傷諸處賑給全活甚眾築海隄易鹹瀉爲膏腴民生祀之

擢刑科給事中轉兵科有邊將坐事賄權貴營脫行千金於叔廉卻之又嘗籌畫西北邊事謂當備薊州諸處疏上後悉如其言升應天府丞轉大理寺正卿以疾乞

休安

志

楊標字廷瞻清江人嘉靖進士授行人遷御史巡按廣東會海寇平中官陳洪思冒邊功蔭襲論沮之累遷應天府丞以事外補轉浙江副使值營兵爲亂單騎入其營底定之改廣東參議平劉青山之亂以功進雲南參

政卒

人物志

錢天挺字子松清江人隆慶中由明經授邵武通判丁艱補亳州同知監修高家堰濬黃河以勞績著稱奉命賑濟定遠天長諸縣泗壽和三州撫輯流移舉卓異遷

化州知州未赴卒

人物志

朱孟震字秉器新淦人隆慶進士任南雄歷南北部郎出守重慶卻黔中接濟餉千餘緡時稱廉介擢潼關兵備副使分守冀南值歲歉發廩施粥以活流移及春民閒種穀俱盡出俸錢市粟給之遷四川按察使蜀人歲苦採辦請於臺使奏罷三之一詔賜金帛加二品俸轉貴州左轄宣慰安國亨素獷悍爲邊患數以餽餌謝弗受示以威信國亨大懼入爲順天尹巡撫山西再靖嚴疆以疾請告歸

人物志

黃學字以行新淦人萬歷鄉薦汝州同知遷常德府同知常德爲水陸衝郡產大木郡丞故攝權事會有增稅之命諸商惶怖學力請於臺使得酌減十之七視篆桃

源武陵二縣威惠並著蠻人不敢爲寇御史上其功數被褒異秩滿冢臣孫丕揚欲以監司薦壘聞力辭之乞

歸人物

志

聶尚恆字惟貞新淦人父素貴潛心理學尚恆隨父任太倉訓導萬厯中以鄉薦爲廬陵教諭升撫甯令邑故臨邊尚恆悉力防禦城賴以全革巡邊酒席卻貂客販獲常例錢廉能著聞仕終甯化令

人物志

蕭以裕字守宏清江人由鄉貢授宜都令宜都貧民治江以砂金爲生會開採令下中使橫索欲沒淘沙戶千家蕭力請於臺司得免秩滿遷惠州同知擢知廣西府討平江外東山二番升山東長蘆運使致仕

人物志

彭而珩字鰲白清江人由進士爲汀州司理署郡事有

廉稱擢南臺御史巡視下江戊子歲大侵疏請蠲賑復奏請江楚二省改折俱報可視屯政以贖錢千餘入社倉備賑轉海南憲副以母老不行子元祚亦進士人物志黃之俊字君籲清江人萬厯進士除海鹽令政尚清簡會海塘傾圯邑幾沼之俊躬自督築七月而成丁內艱服除遂不仕府志

熊鏌字華卿清江人萬厯進士授刑部主事恤刑山東著讞疑錄轉員外郎會科臣有言倭事和議不便狀忤旨下部鞫鏌力爲申救同官皆得罪左遷南大理評事

泰昌改元卹贈光祿寺丞

府志

簡懋爵新喻人萬厯鄉薦累官惠州知府先是同知眞定時魏璫用事同官咸欲爲璫立祠懋爵不肯鐫名其

黨遂誣侵漁撫賞遣緹騎逮問臨行作詩自分必死至
南京璫敗還調韶州歎曰吾老矣安能折腰竟解綬歸
後魏黨復以撫賞中之逮至京其子寬搥登聞鼓白冤
放歸卒

人物志

聶心湯字純中新淦人由進士授錢塘令建虎林書院
以崇正學淪西湖水溉三郡田遷工部主事轉營繕司
郎中時少府舉詘中貴多盤據爲姦力消耗蠹省金錢
數十萬擢廣西兵備命未下淮撫李三才以盜木占廠
諸不法事下所司按驗湯持之力坐與黨人忤罷歸補
趙州知州復與魏黨私人有隙削籍崇禎初起知滁州
以病不克赴

人物志

祝耀祖字述卿清江人萬厯進士初令崑山以最聞拜

工科給事中彈劾無所避嘗發白養粹姦狀後果敗會
邊警戒嚴耀祖揭榜禁門稽察宿衛上取榜入覽喜曰
巡視正宜爾尋以忌外補終按察司僉事府志

黃一鳳字時鳴峽江人由進士授刑部郎中出爲平陽
知府未赴卒生平博覽典籍尤研精理學事繼母以孝
聞在刑曹多決疑獄家無餘財時人推其廉介府志

黎祖壽字收溢清江人萬歷進士爲南刑部主事以外
艱歸服闋補北工部時水衡金錢久爲中貴窟穴會郊
祀肇舉諸費猝然倚辦姦商市賈率營求中官支領冒
破祖壽條陳摘發疏上羣閹持之未幾楊左被逮人言
籍籍祖壽屹不爲動崇禎改元起吏部考功郎杜抑僥
倖再參媚璫二十人以勞疾卒於官人物志

饒思鄒字克紹新淦人幼孤隨母守節外家以明經歷

羅田教諭令新甯反獍獍侵田數千畝多政績

府志

張堯文字復吾新淦人萬厯進士爲涇縣令擢南武選主事歷職方員外郎時倭寇告警樞臣議汰舊兵以增新兵人心譁動堯文條上利害羣議帖息出守池州以憂去補衢州守衢有銅山內監劉忠奉旨開採頗擾民堯文每事裁抑酌定稅額中貴爲之斂手轉臨江副使稅官馬堂殘剝商賈堯文陰折辱其左右堂曰是嘗厄劉內侍者遂避去尋奉檄治河建八議卒用其言以有

成人物

志

程達字順甫清江人萬厯進士授崑山令崑山莊家區田千頃民困逋賦率他徙達親詣其處相蓄洩築隄二

百餘里遂稱樂土號程公隄再調仁和擢御史巡按廣東首疏中官張鯨不法事外戚鄭氏冒領度支錢二萬緡達復上疏論列直聲震中外以忌出守泉州升兵備副使尋秉臬憲歷浙江貴州布政使加太僕卿致仕府志熊化字仲龍清江人萬歷進士授行人司冊封蜀藩再奉命使朝鮮賜一品服朝鮮人好其文翰曰得熊君片紙勝十斛明珠也使回贈遺一無所受臨別王使其相獻名馬至關以書歸之尋擢御史疏論輔臣方從哲誤國不報左遷淮陽副使投劾歸及甲申之變入閩從唐王已知事不可爲復歸嘗以藥自隨誓與國爲存亡江西大定作絕命詞自縊死桂王賜諡文毅人物志嚴君教字玉雲新喻人由鄉舉授潯州司理辭稅務不

私其利以卓異知麻哈州州舊無學宮諸生寄肄於府

君教爲立學復請增置弟子員後升鎮江同知卒

府志

何偉新喻人萬厯進士知惠州剛介廉明庶務修舉葺
黻宮建郡坊改賓館設北關防盜皆事之大者升本道

憲副

廣東通志

施天德字象尼新喻人萬厯進士知潮陽調休甯皆有
善政擢兵部主事遷武選郎中三疏諫熹宗內操再疏
詆魏璫配祀廷辨三案甚力崔魏嫉之出觀察徐淮以
疾歸逆璫矯旨削奪誥命卽所在勘問誣賊論戍死崇
禎元年給諫薛國光疏請卹詔贈大理寺卿

安志

曾櫻字仲含峽江人萬厯進士授工部主事厯遷常州
知府愷悌公平不畏彊禦織造中官李實迫知府行屬

禮櫻不從實移檄以爾汝侮之櫻亦報以爾汝卒不屈
高攀龍繆昌期李應昇被逮櫻助昌期應昇資而經紀
攀龍死後事宜與毛士龍武進孫慎行坐忤魏忠賢當
戍櫻庇緩之崇禎元年以右參政分守漳南九蓮山賊
犯上杭櫻募壯士擊退之夜搗其巢殲賊殆盡帝信東
廠言以櫻行賄謀擢官命械赴京士民以櫻貪醖金辦
裝耆老數千人隨至闕下擊登聞鼓訟冤帝命毋入獄
俟命京邸以故官巡視海道尋以衡永多寇改湖廣按
察使分守湖南時賊已殘十餘州縣而永州知府推官
咸不任職櫻薦蘇州同知晏日曙歸德推官萬元吉才
兩人方坐事罷官以櫻言並起用一方遂安遷山東右
布政十四年春擢右副都御史巡撫其地明年遷南京

工部右侍郎乞假歸初山東被兵巡撫王承吉所部濟
兗東三府州縣盡失匿不以聞及兵退以恢復報而櫻
所部青登萊三府失州縣無幾盡以實奏及論罪承吉
反擢兵部侍郎總督薊遼而櫻奪官逮下獄不十日京
師陷賊盡釋諸囚櫻乃還唐王稱號鄭芝龍薦起工部
尚書兼東閣大學士掌吏部櫻尋進太子太保王駐延
平令櫻留守福州破櫻挈家避海外中左衛越五年其
地被兵自縊死

國朝賜諡忠節

明史 勝朝
殉節諸臣錄

張茂頤字元貞新喻人萬厯庚子與父啟宗同舉於鄉
登天啟進士授工部主事督易州山廠題改炭價商困
以甦當補吏部魏璫惡茂頤不出其門轉虞衡郎出爲

廣東參政海寇李魁奇犯電白禦卻之轉浙江副使卒

貧無以殮邑人晏日啟官浙率屬治其喪以歸

人物志

胡志傳字子肖峽江人萬厯鄉薦由教諭擢馬湖推官

奉檄署眉州築城簡卒並有方略賊舟至城下志傳迎

戰賊敗去御史上其功以勞瘁請休卒

人物志

盧汝鵬字子羽新淦人天啟鄉薦厯德安教諭知開化

縣歲饑賑救全活數萬人山賊李子成等攻剽遂樂諸

邑徧開化設法禽勦三邑皆得全擢知和州以最遷工

部員外郎未赴卒

府志

簡欽文字其敬新喻人天啟進士授泉州推官擢吏部

時魏璫煽虐欽文守正不阿內艱服闋補選郎未赴卒

白志

張叔鏜字振卿新淦人天啟進士初令秀水潔己勤職
清蠹摘姦時號神君魏璫聞其名欲得之以自重卻謝
不往遂降甯國府教授後璫敗升國子助教子壽祺同
榜進士官南京御史

人物志

張問士字達可峽江人崇禎中舉賢良方正授知縣上
疏有聖主殷憂已極舉世聾瞶自如臣忠憤迫切義不
顧私願乞殘邑以酬國恩以倡忠義之語遂授北流令
至縣繕城郭修武備寇至身先行閒殲其渠帥邑賴以
安御史奏其才遷知壽州卒

人物志

曾植字季培峽江人入南雍學士黃道周以賢才薦授
泉州同知泉濱海番舶例餽數千金悉卻不受尤善決
獄七邑中告理者皆詣之有武弁秦士匪犯法將刑奇

其貌釋之後仙遊有寇僭稱王植奉命督討至則相率乞降乃知僭號者卽土匪也以功升參議尋擢光祿寺少卿不赴歸

人物志

郭裕字謀貽清江人崇禎舉人棗陽知縣甫視事張獻忠兵至左良玉屯近邑裕單騎邀與共禦賊卻去十五年冬李自成犯襄陽賊將劉福來攻裕發礮石擊傷多賊憤攻益力城陷裕身被數槊大罵賊支解之闔門遇害

國朝賜諡忠烈

明史陳美傳朝殉節諸臣錄勝

曾曰琥字白卿清江人崇禎恩貢初授興國州判治漕有績升楚雄通判提舉黑鹽井擢敘州同知土司峒梗不法曰琥諭誠申飭山峒革面向化時流賊犯川督師

會勦以軍功加川南僉事卒

府志

羅伏龍新喻一作人故梓潼知縣改江都受代甫三日

城破死

國朝賜諡節愍

明史史可法傳
勝朝殉節諸臣錄

萬發祥名養正以字行新喻人崇禎進士累官兵科給事中甲申變作聞馬世奇吳麟徵殉節往哭之爲賊執酷刑偏降不從賊遁聞關南返入贛佐楊廷麟軍城破死

國朝賜諡烈愍

人物志
勝朝殉節諸臣錄
謹案人物志第云寓居吉州不云殉難今據勝朝殉節諸臣錄改正傳亦云同殉其官則以編修兼兵科也

楊廷麟字伯祥清江人崇禎進士授編修與黃道周善十年冬皇太子將出閣充講官兼直經筵明年二月帝

御經筵問保舉考選何者爲得人廷麟言保舉當嚴舉主如唐世濟王維章乃溫體仁王應熊所薦今二臣皆敗而舉主不問是連坐之法先不行於大臣欲收保舉效得乎帝爲動色其冬京師戒嚴疏劾楊嗣昌嗣昌恚詭薦廷麟知兵改兵部職方主事贊畫盧象昇軍象昇甚喜卽令往真定轉餉濟師無何象昇戰死廷麟報軍中曲折嗣昌擬旨責以欺罔貶秩調外都城失守廷麟慟哭募兵勸王福王立用御史祁彪佳薦召爲左庶子辭不就宗室朱統鐔誣廷麟召健兒謀不軌以大學士姜曰廣爲內應王不問南都破江西諸郡惟贛州存唐王手書加廷麟吏部右侍郎與國子祭酒劉同升督師復吉安臨江加兵部尚書兼大學士尋入贛圍守半年

大兵登城督戰久之力不支走西城投水死

國朝賜諡忠節

明史 勝朝
殉節諸臣錄

胡若坦字君平峽江人諸生崇禎癸未流寇至邑坦奉
母楊氏奔避楊年老行遲爲賊獲被殺坦呼號奪賊刃
與賊格不勝賊剗坦耳昏仆地復起立搏賊且罵遇害

國朝入祀忠義祠

安志 勝朝
殉節諸臣錄

鄒瑄字清臣龔善選字大生清江人並崇禎庚午鄉舉
聞都城陷遂與楊廷麟同起義兵敗死

縣志

黃尚賓清江人崇禎己卯副榜新例准貢試吏部得知
縣甲申明亡從楊廷麟起兵挈家寓雩都丙戌閒關廣
西以興安知縣督狼兵援贛既至而城破仍歸粵擢至
分守左江道副使戊子以太僕卿副閣師晏日曙宣諭

江西日曙道死尚賓至江西見事不支匿雩都山中已而走燕臺謁故薦主王永吉適蔡士英出撫江西求幕僚永吉謂尚賓子可藉手救江西且爲先人存舊臘士英以二子從學再歲謝歸築室鹿江自稱虎溪樵者縣志黃尚寶尚賓弟諸生受業楊廷麟之門丙戌從廷麟巷戰死同郡諸生楊廷鴻曾應文及寶從父監軍介中並力戰而歿縣志

國朝

劉子壯字克猶清江人幼喪母父攜客湖廣遂以黃岡籍領崇禎庚午鄉薦再試禮部不第值寇亂乃杜門不出順治六年一甲一名及第授翰林院修撰先是聊城傅以漸武進呂宮皆以廷對第一人相繼爲大學士子

壯繼起風度偉然都人以太平宰相期許時進賢熊伯龍亦以是科由湖廣寓籍及第俱負文譽海內稱熊劉子壯一爲會試同考卽乞歸卒

府志

傅世烈字若武新喻人順治甲午恩貢盱江教授先是郡諸生潘翹生下獄世烈力雪其冤應鄉試成解首授四川渠縣令爲同考官大學士張鵬翮出其門一時有知人之譽再任延津遷雲南和曲知州時滇黔甫平巨寇未殄軍符絡繹世烈悉具供張兵不乏食境中伏莽不靖請置軍彈壓內亂潛弭嘗清釐圈佔請免省運有

實政服官六年卒士民惜之

府志

金士升字初允清江人少遊楊廷麟之門廷麟殉節士升簪冠道服以卜筮終學者稱陽谿先生

府志

施聖揆字歷開新喻人十歲喪母擗踊絕食父慰勉之
得不減性終喪盡禮如成人家貧事父必覓甘旨父病
篤籲天夜禱刲股和藥幾絕而復甦越日父竟瘳久之
父歿廬墓三年有白鶴飛繞悲鳴與哭聲相和繪親像
每食必薦出告反面至年七十餘如一日雍正八年

詔旌其門

請旌錄

黎騫字子鴻清江人拔貢生父祖壽明萬歷進士官南
吏部郎中祀鄉賢康熙己未舉博學鴻詞科騫與李來
泰崔如岳李澄中高詠並為都御史鞠珣所薦試入二
等授翰林院檢討與修明史同徵毛奇齡朱彝尊彭孫
適喬萊並推重騫賦詩相酬答乞假歸卒所著玉堂集
其子洪景掇拾成之今散佚無足本

鶴徵錄
府志

廖鼎新清江人歲貢生永豐

今廣豐

訓導性剛正勤訓迪

每集諸生勉之曰功令尊程朱當知程朱之說在身體力行非僅教人爲應試文也士人於聖賢言語無心得卽文詞日工徒空言耳康熙十三年四月耿逆告警廣信城守副將柯昇受僞檄挾標下兵反奪城出將入閩取道永豐劫掠城市令丞皆竄走或勸鼎新出避鼎新曰將焉往吾平日以忠孝教人豈欺人語邪朝服坐明倫堂賊至死之舉家皆殉難

廣信府志

曾寅字以人清江人初名憲祖康熙進士改庶吉士授檢討累擢河東鹽政寇難後民多流亡寅招徠綏輯俱復其業躬履鹽場相度形勢修隄塹築甌城三十餘里開新渠九里有奇初畦戶引水以斗寅教民用桔槔開

百世之利改山西布政使糧驛參議分守冀甯道所至
留意人才建書院崇司馬光薛瑄之學再補陝西甘肅
道副使乞歸寅精研理學與施閏章魏象樞相契合嘗
言持其志無暴其氣爲主靜處事曲盡物情爲格致卒

祀鄉賢祠

府志

李煥斗字次箕新淦人少貧力田刈薪自給年十七始
就學康熙進士官山西廣靈知縣歲大旱設粥賑饑復
詣大府請賑時適小雨僉議罷賑煥斗持不可大府怒
次日出見饑孺盈野大驚曰非李廣靈幾誤我事調權
蔚州計典膺薦入爲工部主事民建祠祀之刑部尚
書魏象樞贈之詩有慈母玉壺之比累遷陝西甯夏道
大水決隄役丁修築吏民不擾以民詬督運官事聞得

罪久之釋復原官卒

府志

邊勳字子猷峽江人少爲諸生從施閩章講學於吉州康熙鄉舉選知江南太平縣未之官休致生平質直言行一出於至誠手不釋卷尤熟於史所著有集蓼山房

詩草古文雜著四卷

白志

王言字慎夫新淦人康熙進士官馬平知縣地衝繁供億恆不給言汰之遂爲定法時提督議勦烏石獠言躬詣請撫事定全活甚眾累官養利永康知州多惠政緣事左遷巡撫彭鵬特薦清官第一授直隸永清知縣

聖祖巡幸視河工駐永清

召對賦詩稱

旨尋擢宛平令再以逸囚議降調順天府尹施世綸方擬申薦

力辭歸子泰姓進士累官至順慶知府文章政事並有聲譽家珏鄉舉珏子雲煥進士累官給事中出爲青州知府以廉潔著聞雲翔進士湖北蒲圻知縣擢同知累權黃州武昌諸府鄂爾泰官巡撫時最器賞之府志縣志傅克生字肇成清江人父大道諸生潛心性學克生康熙進士湖南瀘溪知縣改浙江武康知縣

聖祖南巡大吏以循良薦

御書清慎勤三字賜之擢戶部山東司主事改禮部儀制司致

仕家素貧無所增益歸裝惟載書數百卷卒年七十六

祀鄉賢祠

倪見龍撰墓志

晏斯盛字虞際新喻人康熙進士改庶吉士散館授檢討擢山西道監察御史以忠讜結

上知賜浮水硯筆墨諸物曰此大學士朱軾所進今以賜汝可
時時把玩勉爲朱軾時鑲紅旗番役妄指頂馬辱搢紳
斯盛以聞得

旨嘉獎出督貴州學政以黔儒孫淮海李同野陳五栗馬心庵
諸家之學爲諸生提唱擢鴻臚寺少卿古州苗叛總兵
某以軍事相諮用斯盛言扼要害遂復黃平州回京充
會試同考官旋擢安徽布政使歲比旱大江以北民多
游食斯盛請以工代賑成江北水利書二卷以憂歸及
禪起擢山東巡撫時江南饑方議由登萊撥穀下海道
斯盛疏言海洋勢險二郡采買爲難今由德州臨清截
漕十萬卽可從河道順流而下濟甯臨清積穀十萬亦
可碾米接濟

詔嘉之調湖北巡撫進戶部侍郎母老乞歸斯盛行政以士習

農田積貯爲先務尤盡心荒政乾隆十七年入都祝

皇太后萬壽

上詢斯盛母年斯盛對以八十有八

御書春永護庭四字賜之歸里卒

賜諭祭所著易解收入

四庫全書

府志

李師白字欲仙峽江人廩貢生授崇義教諭遷山東歷城知縣青海用兵奉檄督運歷朞有六月馳驛三萬里作進藏錄記其事歷城歲額給軍丁麥千石會歲饑師白請停徵麥以貯米給軍民稱便邑有蝗力捕之蝗不爲災築壩隄禦水四境無衝決之患以功擢行人司行

人老病乞歸子必翔池州判厯權含山知縣廬州同知

奸宄屏迹升泗州知州

府志
縣志

楊錫紱字方來清江人少爲諸生卽知名雍正進士吏部考功司主事累官至廣東肇羅道端己率屬無敢私謁肇境田多瀕海藉圍基爲外衛歲往周視修築必固終任無水患權廣西布政使以平土苗吳金銀功擢授廣西巡撫貴州土苗復叛禽其渠旣而遷江土苗謀犯思恩復獲首逆李彩文及其餘黨於是嚴保甲周饑乏無俾生亂民以大安屬吏某以人蔑饋諱其名曰長生果怒卻之廉聲上達有不愧四知之論尋入爲禮部侍郎再出爲湖南巡撫嘗謂愚民不知水利數畝之塘率塞爲田遇旱輒成棄壤有司惟知田糧不顧其後上疏

請飭各省督撫凡有陂塘嚴禁改墾從之湖南歲采木
有司至苗地凡木悉加籍記又以賤值購木運販江南
奪商人利錫紱疏請任民自運惟於辰關一爲按驗官
不得與民爭利永著爲例父喪歸起爲刑部侍郎仍撫
湖南再起母喪爲左都御史權吏部尚書出爲山東巡
撫東省二十一州縣水災奏請蠲貸有差魚臺土城低
窪移置高處擢漕運總督與河臣合謀以時蓄洩漕運
無滯時旗丁多疲困嚴飭運官不得私求旗丁感之治
漕最久弊政悉絕乃撰漕運全書若干卷權漕督黃登
賢表上之加太子太保年六十八卒

賜諡勤

愨予祭葬入祀鄉賢子有涵進士知順甯府有撫綏邊

境功遷鹽法道引疾歸

府志
縣志

楊壽楠字遠植清江人少學於楊錫紱乾隆進士改庶吉士散館授編修累官戶科給事中典試貴州同考順天鄉試均號得士出知松江府權上海道時用兵臺灣糧儲多由海上轉輸壽楠供億無缺擢陝西延榆綏兵備道榆西地接河套爲蕃部界壽楠案營屯嚴斥堠問民疾苦號稱盡職以憂歸

府志

習振翎字燦雲峽江人乾隆四十五年應

召試歸舉於鄉四十九年成進士授工部主事累官製造庫郎

中出知開化府德教大行民上廉明公正四頌量移東川改江南徐州知府再遷福建按察使治獄多平反官至山西布政使

府志

陳嘉穀字仰膏峽江人乾隆五十四年拔貢生

朝考第一尚書彭元瑞稱其才時大學士和珅用事欲羅致門下會嘉穀詣座主所和珅適至喻意使出見嘉穀不可和珅銜之奏請覆試遂黜嘉穀先是拔貢

朝考異等授京秩不覆試覆試自此始嘉穀歸益折節自勵累試不售遂不復試以誘掖後進敦品立行爲己任每教及門曰學者無論隱仕均當存濟世利物之心但視力所能爲卽不當諉非己任晚授貴溪縣教諭訓迪不倦於貧士尤惓惓

府志

楊懋恬字雪颺錫紱孫乾隆五十四年拔貢生授工部主事隨那彥成入陝剿賊敘功補屯田司擢員外郎遷郎中出爲安徽甯池太廣兵備道累官江蘇布政使權漕運總督授湖北巡撫力行保甲法規畫嚴肅先是均

州民向志恆以謀財殺左明倫等十八人匿二十餘年
不出自懋恬既嚴保甲志恆無所匿乃獲之興山鄖縣
界中漢陽天門漢川重開淤田舊逋屢易戶仍苦徵索
奏免之鄂江商舶四集時警寇盜檄營弁分巡行之二
年遂著成效署湖督再權漕督卒於任

本傳府志

謹案府志尚有

楊懋所錫綬孫乾隆進士官江南桃源令嘗論治河爲
大學士阿桂所賞終廣西平樂知縣博通經史工書附

誌之

劉世甯字匡宇新淦人父學瀾康熙鄉舉高密知縣有
政聲世甯乾隆進士授涪安知縣涪安明海忠介舊治
也世甯之官嘗揭羣樂堂瑣言於門謂民無異性患導
之不誠耳縣民汪光元悍而黠廉得實拘數其罪光元
叩額乞自新釋之卒改行爲善操冶銀自給人怪問之

曰我不負劉君教耳調黃巖縣人王世璣聘其姑之女符世璣母與其姑鬪姑悔婚嗾其夫賜履鳴學使立狀終身不嫁旣而私以字趙世璣知之陳牒訴世甯引女置對女藏錐自刺世甯私度曰終身不嫁非人情自刺者爲父解也遣之歸而陰令舁於王氏賜履以奪女聞不聽逾年符氏生子世璣亦爲諸生遂罷訟又嘗修朱子舊建六閘集民夫親爲指畫以時啟閉內擢工部營繕司主事累遷山西道監察御史旋授廣東分巡道爲民立簡明條約者八事不煩而治逾年不諧於大吏去職改補吏部文選司主事終戶部山西司郎中與于叟宴卒年八十有一子佳琦自有傳

府志

劉佳琦字步韓世甯子監生以膳錄議敘官綿州州判

擢富順知縣調大竹達州白蓮教起偪縣城佳琦練鄉兵禦賊兼權達州知州俄賊陷東鄉大竹戒嚴佳琦先據要害賊不得逞旣而復由小尖山來窺爲疑兵應之賊畏阻遁去補達州知州總兵某追賊至會擊之大勝行堅壁清野法各郡縣從之賊無所獲會遭父喪循軍禮墨經從戎時升達州爲綏定府卽以佳琦攝府事三省肅清

賞戴花翎調成都知府權鹽茶道

府志

蕭習舜習孔習文峽江人六世同居生齒百餘口規範整肅長幼皆怡然自得鄉里賢之乾隆中

賜旌表

府志

聶庭儀字鳳栖清江人嘉慶鄉舉以大挑官甘肅知縣

補靈臺調永昌勤於聽斷永昌灌田資雪水春夏水漲
農民輒爭訟庭儀度地開渠溉田二千餘頃功利垂久
遠卒祀永昌名宦祠

楊鉅源字恩波清江人初以貢生選官新昌訓導嘉慶
閒舉於鄉仍由儒官薦知縣官房山調遷安再補貴州
貴筑知縣教民種棉習紡績貴筑木棉之利自鉅源始
累擢浙江紹興知府政尚嚴肅積弊頓革時鄰郡奉化
民以徵賦激變逐其令王濟上官檄鉅源權甯波府事
治首禍者變遂息量移杭州知府擢河南開歸陳許道
引疾歸

府志

黃良楷字品芳清江人道光鄉舉起家山東樂安知縣
在官九年膺上考

賁戴花翎量移荏平知縣時捻匪孫三羅漢幅匪魏徐元等倡亂大吏諭良楷知兵調蘭山縣辦賊戰曹平溝禽賊渠王興未餘黨走聚江南邳州良楷越境往勦移知滕縣粵賊窺北方良楷奉檄救金鄉以兵三百人往陣斬僞土司將軍金鄉圍解之曹州率八百人受土寇王尚義降先後得眾萬人出追臨清賊尚義感良楷恩力戰焚徐家樓殲賊無算從親王僧格林沁滅李開芳於馮官屯曹州土寇復起又平之侍郎勝保勦張洛刑奏以良楷兵自隨山東巡撫執不可良楷亦以疾辭事未定

朝命授良楷濟東泰武臨道遂留山東尋奉

命幫辦三省會剿以孤軍駐永城淮南北至長七百餘里賊眾四出良楷大小七十餘戰賊不得越永睢巡撫文煜調

良楷當徐邳聞賊移駐紅花埠勦沂州土寇戰於蘭陵
追殲於剌莊再隸僧格林沁軍解滕縣圍降白蓮池賊
殲其餘黨山東巡撫閻敬銘以良楷精吏治使核州縣
交代清釐五百餘案奏加按察使銜致仕歸卒年七十
有八

府志

劉芳槐字綬堂新淦人道光舉人署鄱陽教諭有富室
訟某生於學使以利啖芳槐屬先除生籍芳槐怒曰吾
豈以秀才貨錢邪卒雪其事補德安訓導勘水災親歷
各鄉紳士無侵隱者咸豐初賊陷九江芳槐倡團練未
幾賊圍南昌以火攻策干當事不果行復上募勇籌餉
議大略謂徵客兵不如募土兵而土兵餉減客兵半足
以集事且使家自爲戰人自爲守則富者必能出財以

資貧貧者必能出力以衛富亦足以佐官糈之乏而省轉運之煩凡數千言亦不省及德安被寇知縣劉希洛方在會城芳槐與守備朱發魁典史王廷瑞同守鄉團敗賊遂入縣芳槐時以丁祭齋宿縣學正衣冠死之年七十八奉

自優卹予世襲雲騎尉

府志忠義錄

黃慶同原名彝字六舟清江人父觀海贛縣訓導以孝聞工詩古文卒年九十慶同道光進士改翰林院庶吉士散館授刑部主事以京察出爲山東知府厯權青州曹州沂州表率僚屬一方稱治時捻髮兩賊互生亂慶同靜鎮籌畫大府倚之爲屏蔽擢濟東泰武臨道府志胡嵩年字爾芳峽江人道光五年拔貢生官南昌府學

訓導癸巳成進士改庶吉士散館授福建長汀縣知縣
爲治本經術有循聲調知福清以戢海盜功加同知銜
兩爲鄉試同考稱得士改補甘肅平番縣知縣兼權莊
浪同知以勞瘁得疾歸至陝西漢中道卒

府志